

四庫全書

史部

欽定四庫全書

史部

御批續資治通鑑綱目卷十八

詳校官修撰

臣

錢 榮

編修

臣

程嘉謨 覆勘

總校官候補中允

臣

王 燕 緒

校對官主事

臣

王 學 海

膳錄監生

臣

蔣 濬

欽定四庫全書

御批續資治通鑑綱目卷十八

起戊辰宋寧宗嘉定元年盡
甲申宋寧宗嘉定十七年 凡十七年

戊辰 嘉定元年 金泰和 春正月以史彌遠知樞密院事。

王柟還自汴三月以韓侂胄蘇師旦首畀金

柟至汴請依靖康故事世為伯姪之國增歲幣為三十萬犒軍錢三百萬貫蘇師旦等俟和議定後當函首以獻完顏匡具以柟言奏於金主璟命匡移書索韓侂胄首以贖淮南地改高軍錢為銀三百萬兩會錢象祖移書金帥府喻以誅韓侂胄事柟未之知也一日匡問柟曰韓侂胄貴顯幾年矣柟曰已十餘年

平章國事才二年耳匡曰今欲去此人可乎桡曰主上英斷去之何難匡顧之而笑和議始決遣桡持書求函侂冑首以贖淮南桡還言於朝詔百官議吏部尚書樓鑰曰和議重事待此而決姦究已斃之首又何足惜遂命臨安府鄞棺取首梟之兩淮仍諭諸路以函首畀金之事遂以侂冑及師旦之首付王桡送金師以易淮陝侵地

發明

嗚呼宋事至此浸不可為大抵為國之道當以自強而勉於為善則國之大小不足計也

致堂胡氏曰有父之讐忍恥不報則曰春秋責息兵以華憂之尊臣服仇敵則曰文王事昆夷宋自高宗以迄於今武功之不競未有甚於此時者也國勢之不振未有踈於此時者也姑卽和議一事觀之開禧啓蒙兵連禍結淮南陝石相繼陷沒民之死於鋒鏑者不可勝計而竟不能與之一決徒

以遣使連有丐求和好欲增歲幣則不吝增之欲得首謀則以首界之如子事父罔敢違逆殊不知國體之損亦多矣當時樓鑰諸臣以為姦宄已斃之首又何足惜然亦誤矣蓋已斃之首固不足惜一國之體誠為可惜界之以首其如國體何然則宋之君臣奚若是之愚哉綱目書此文無貶詞乃所以深貶之爾

廣義 二姦死首固不足惜與之適足以弱國體耳

復秦檜爵諡

廣義 和議乃檜亡宋之術非為宋之本心也宋人至此尚不覺悟悲哉或云此舉畏金其言然矣

○臨安大火

火凡四日焚御史臺等官舍十餘所民舍五萬八千九十七家城內外亘十餘里死者甚衆城中廬舍十燬其七百官多僦舟以居民訛言相驚亡賴因而縱火為姦

發明

秦檜權姦誤國得以棺槨全終不為不幸又何王爵之可加乎前書追奪王爵改謚繆醜此固天下之公議於茲而復抑何禮耶然追奪之者必悟和議之失耳前日之奪是則今日之復為非今日之復是則前日之奪為非寧宗必居一於是矣當時闕政匪一奚屑屑以復秦檜之爵謚為事哉秦檜之爵謚甫復臨安之大火隨見夫以賊檜之見絕於天而災異承之速於桴鼓之相應此蓋人神共憤特假此以示宋不宜追復焉爾惜乎寧宗不足以語此也綱目比而書之其義自見

夏六月金人來歸大散關及濠州

王桷以韓侂胄蘇師旦首至金主璟御應天門備黃麾立仗受之百官上表稱賀懸二首并畫像於通衢令百姓縱觀然後漆其首藏於軍器庫遂命完顏匡等罷兵更元帥府為樞密院遣使來歸大散關及濠州

衛湮罷。林大中卒。秋七月召卹密同知樞密院事未至卒

密儀狀尉傑機神英悟嘗慷慨曰生無以報國死願為猛將以報敵其忠義蓋天性也

八月以婁機同知樞密院事樓鑰同知院事

銡持論堅正忤韓侂冑意奉祠累年機初為太常少卿侂冑開邊機曰恢復之名非不美今人才難得財力未裕萬一兵連禍結奈何鄧友龍曰不逐此人則異議無所回遂斥外及入樞府時干戈甫定信使往來機裨贊之功為多尤惜名器守法度進退人物直言可否不市私恩不避嫌怨

廣義

機銡並用可謂得人文無美辭而美自見矣

賑江淮流民

出米二十萬石錢一百萬緡命江浙制置司賑之

九月金遣使來和議成

下詔以和議成諭天下呂中曰和戎國家之不得已也然必有以折其氣而後可以要其成今嘉定之和

敵有求於我歟我有求於敵歟彼欲得權倖之首則與之彼欲增歲幣之數則與之屈已而和皆由於我敵情反覆寧無易我之心乎未及數期渝盟犯順然則和議詎可恃邪

發明

開禧至是宋遣使如金往來不一必飽其欲然後報聘其輕侮於宋可知也曰和議成譏

宋也宋金不共戴天之讐累世偷安固無足齒然縱不能定畧於中原亦當保境自守勿與通和以示不忘大讐可也夫何既啓敵釁仍又乞盟屈已於戎有求必得意以讐不可復敵為可信女真之志遂矣其如宋室何哉莊公與齊通好君子以為親仇讐而譏之宋之和金奚異於是直書於冊深賤之也

冬十月以錢象祖史彌遠為左右丞相雷孝友知樞密

院事樓鑰同知院事婁機參知政事。金主璟卒衛王
永濟立

永濟世宗第七子也金主無子疏忌宗室以永濟柔
弱鮮智能故愛之欲傳位焉會永濟自武定入朝金
主已感疾遂留不遣金主殂元妃李氏黃門李
新喜平章政事完顏匡等定策奉永濟卽位

廣義觀分注所載則知女真之運其衰矣乎噫女
真之衰蒙古之盛天所以啟元祚而厭金德

之衰
興

贈趙汝愚太師沂國公

謚忠定後
追封福王

發明 汝愚輔相光宗有奠安宗社之功固非他相比也然誣謫讒忌以沒其身至是追復官爵

加以褒贈是亦公論之不
容泯者書以予之宜矣

十二月錢象祖罷

已二年

金主永濟
大安元年

春正月以樓鑰參知政事章良能同

知樞密院事宇文紹節簽書院事○夏四月金主永濟

殺其故主璟妃李氏

初章宗遺詔內人有娠者二人生男則立為儲貳平
章政事布薩端承金主意奏先帝承御賈氏當以十
一月免乳今已逾期范氏產期合在正月今醫稱胎
形已失願剖髮為尼金主乃以范氏損其遺腹詔中

外而殺元妃李氏承御賈氏以布薩端為右丞相

發明

永濟章宗之弟李氏章宗之妃永濟承章宗之統其可因讒而殺兄之妾乎蓋宮人損胎

又非李氏之故永濟不能察理無辜殺之則是傷其故兄之情矣正名定分永濟安得而擅殺哉故綱目斥名而書殺所以深罪之也

廣義

永濟初立卽肆殘忍而自斬其澤豈能享國久乎

五月起復右丞相史彌遠

彌遠以母憂歸治喪太子請賜第行在令就第持服以便咨訪

發明

有書起復者書起復何讖也非有金革之事奪人之喪自奪其喪皆非矣故雖以舊職起

復而書若新職者所以志其非金革也然起復由君終喪由臣苟能力辭不起寧宗安得而強之乎蓋由慕富貴之心勝蔑禮法之心輕一聞起復怡然就道畧無可否於其間者豈不深可哀哉直書起復其惡自可見矣

廣義

大抵居廟堂而與天子相可否者宰相也宰相之重卽唐虞之百揆有周之冢宰故百官

馬以表率庶民馬以仰賴為上為德為下為民社稷之安危係焉生民之休戚關焉誠所謂禮樂之原風化之本也詩云赫赫師尹民具爾瞻此之謂乎一有偏蔽則上無以正君下無以善俗所謂辟則天下僂者此也況孝為百行之源相乃百僚之倡焉可棄衰經以饗富貴而犯不韙之名乎且明王以孝治天下也獨不思曰三年通喪貴賤無間孝宗能行三年之喪士庶賢之光宗不肯成服人

心離貳吾為首相奚可冒哀匿服上與天子相唯
諾耶縱不愧於人獨不愧於心乎蓋心者一身之
主宰萬事之本根此心既忍為此則何事而不可
忍為耶其流毒至於殷濟王者此其心一念之忍
故也厥後執政起復恬不知恥動以彌遠藉口甚
則至於賈似道復以亡宋者皆彌遠之作俑也居
是位者可
不鑒諸

蒙古入靈州夏主安全降

夏自是
益衰

秋八月罷四川宣撫司。冬十二月輝和爾國降於蒙
古

輝和爾唐
之高昌也

庚午三年

金大安二年

夏四月朔日食。秋八月夏侵金葭州。

夏自天會初與金議和八十餘年未嘗交兵至是為
蒙古所功求救於金金主永濟新立不能出師夏人
怨之遂侵葭州金虔
善努擊敗之而去

冬十二月婁機罷

機立朝能正言好稱獎人才不遺寸長訪問賢能
疏列姓名及其可用之實以備採取至是以老罷

蒙古侵金

金主永濟嗣位有詔至蒙古傳言當拜受蒙古主問
金使曰新君為誰使曰衛王也蒙古主遽南面嘿曰

我謂中原皇帝是天上人做此等庸懦亦為之邪何以拜為卽乘馬北去金使還言永濟怒欲俟蒙古入貢就害之蒙古主知之遂與金絕益嚴兵為備數侵掠金西北之境其勢漸盛金人皇皇遂禁百姓傳說邊事

發明

外邦相攻不書此何以書著蒙古之漸強明女真之漸弱也侵者潛師入境之謂自是兵連禍結而浸為傾宋之謀矣故特謹而書之

廣義

金人之亡其兆於此且邊事之報是豈當禁者耶其禁百姓傳說邊事者卽後唐怕見石

卽之說也可笑也夫

辛未四年

金大安三年

春三月臨安大火

焚省部等宮舍延及太廟詔遷神主於壽慈宮三日
大息仍還太廟省部皆寓治驛寺焚民居二千七十
餘家

發明

臨安大火至是屢見矣嘉泰元年一書四年
一書嘉定元年一書是年一書然前之所驗

者為侂冑擅權開邊啓釁而發此之所驗者為金
人浸強漸為宋患之應嗚呼禍患未形而災異先
見無非欲世主兢業自強勉於為善故耳宋之君
臣方且既與敵盟常敦歡好而置邊事於不問豈
有災異頻仍視為常數而般樂怠傲者尚
可與論治國之道哉一書再書存後鑒也

夏四月金使人求和於蒙古蒙古不許

初納哈塔邁珠守北鄙知蒙古將侵邊奔告於金主
金主曰彼於我無釁汝何言此邁珠曰近見其鄰部

附從西夏獻女而造箭製楫不休凡行營則令男子
乘車蓋欲惜馬力也非圖我而何金主以其擅生邊
隙因之及蒙古侵擾雲中九原連歲不休遂破大水
礮以進金主始恐釋蓮珠而遣西北路招討使鈕祜
祿哈達求和蒙古不許金主乃命平章政事通吉遷
嘉努參知政事完顏呼實行省事於撫州西京留守
赫舍哩呼沙呼行樞
密院事以禦蒙古

廣義

抑觀阿古達之造金也何其智勇之多永濟
之繼世也何其愚弱之甚噫此豈人之所能

哉今也金人求和於蒙古蒙古不許昔也汴宋求
和於金人金人亦嘗不許孰謂天道之不好還也
哉

六月遣使如金不至而還

賀生辰也時金有蒙古之難不暇延使者至涿州而還尋詔江淮京湖四川制置司謹飭邊備

發明

昭二十三公如晉至河有疾乃復君子明其有疾乃復殺恥也寧宗遣使如金固多而一

見止不得入以中國之胃萬乘之君執幣帛脩敵國之好而不見納斯亦可哀矣胡氏曰有恥而後能知憤知憤而後能自強自強而後能為善為善而後能立身身立而後能行其政令保其國家矣寧宗內則受制於權臣外則見陵於強敵此正憂患疾有德慧術智保生免死之時也而安於屈辱甘處微弱無憤恥自強之心其國勢陵夷終於不振其自取之哉

秋八月夏主安全卒族子遵頊立

遵頊改元光定
號安全曰襄宗

蒙古攻金西京留守赫舍哩呼沙呼棄城遁金西北諸
州皆降蒙古

金通吉遷嘉努完顏呼實至烏舍堡未及設備蒙古
兵奄至拔烏舍堡及烏雲營蒙古主乘勝破白登城
遂攻西京凡七日呼沙呼懼以麾下棄城突圍遁去
蒙古主以精騎三千馳之金兵大敗追至翠屏口遂
取西京及桓撫州蒙古主復遣其子卓沁察罕台烏
格台三人帥兵分取雲內東勝武朔豐靖等州由是
金德興弘州昌平懷來緡山豐潤密雲撫寧集寧東
過平樂南至清滄由臨潢過遼河西南至忻代皆降
於蒙古

發明

呼沙呼既為留守親統強兵當蒙古驟至之
時正委身報國之日則不辱君命矣不能以

此自明而乃效匹夫之行遁逃苟免不亦恥乎由是西北諸州皆降蒙古其罪可勝誅哉特書棄城遁所以著其不知命之罪也金氏之亡於茲決矣

閏九月金兵禦蒙古敗績於會河蒙古遂入居庸關大掠而去

蒙古主旣破撫州休士牧馬將遂南何金主復命招討使完顏糾堅監軍完顏萬努等率兵號四十萬駐野狐嶺以備呼實率重兵為後繼或謂糾堅曰蒙古新破撫州方以所獲賜其下馬牧於野當乘其不虞掩擊之糾堅曰此危道也不若馬步俱進為計萬全蒙古主聞之進兵於權兒背糾堅遣麾下明安問蒙古舉兵之故明安反降於蒙古以虛實告之蒙古主遂與糾堅等戰金兵大敗人馬蹂躪死者不可勝計

蒙古乘銳而前呼實畏其鋒不敢拒戰引兵南行蒙古兵踵擊之至會河堡金兵又大敗呼實僅以身免走入宣德蒙古兵乘勝薄宣德遂克晉安縣遊兵至居庸關守將完顏福壽棄關遁蒙古兵克之金中都戒嚴禁男子不得輒出城蒙古遊奕至都城下金主欲南奔汴會衛卒誓死迎戰蒙古兵損折頗多遂襲金羣牧監驅其馬而去金主乃止命秦州刺史珠格高琪屯通玄門外尋降呼實為咸平路兵馬總管將士以其罰輕由是並不用命

發明

春秋之法言敗不言戰均敵也書金兵禦蒙古敗績於會河所以惡金主失道故以金兵

自敗為文行師之道當得老成之人今以四十萬衆而無所統又以小人臨之取敗之道也夫以步騎四十萬之衆一旦無故而敗績然則金之不亡豈有是理乎大掠而去所以見金人雖有精兵而

人不用命師徒撓敗國勢漸危悲夫雖然金人憑陵中國佔據土宇兵連禍結今而蒙古之侵殆亦天意假手以示好還之報耳夫豈偶然之故哉

冬十一月朔日食○金以圖克坦鑑為右丞相赫舍哩呼沙呼為右副元帥

鑑為上京留守聞中都戒嚴曰事急矣乃選兵二萬遣同知烏克遜鄂屯將之入衛金主嘉之徵拜尚書右丞相先是鑑上言曰自國家與達剌交兵以來彼聚而行我散而守以聚攻散其敗必然不若入保大城併力備禦昌桓撫三州素號富貴人皆健勇可內徒之以益兵勢人畜財貨不至亡失參政梁瑄曰如此是自感境土也金主從瑄謀鑑復奏曰遼東國家根本距中都數千里萬一受兵州府顧望必須報可

誤事多矣可遣大目行省以鎮之金主不悅曰無故置行省徒搖人心耳不從及失三州又聞東京不守金主乃大悔曰從丞相之言當不至此我見丞相恥哉○呼沙呼之棄西京而還也至蔚州擅取官庫銀五千兩及衣幣諸物奪官民馬與從行人入紫荆關殺來水令至中都金主皆不問以為右副元師呼沙呼並無所忌憚自請兵二萬北屯宣德金主與之三千令屯媯川呼沙呼不悅

金益都楊安兒兵起

初益都人楊安國少無賴以粥餬才為業市人呼為鞍兒遂自名楊安兒泰和中金人南侵山東無賴往往聚聚剽掠命州縣招捕之安兒時為羣盜亦請降隸名軍中累官至防禦使及蒙古兵薄中都詔招鐵瓦敢戰軍得千餘人以唐古哈達為都統安兒副之以戌遼安兒至雞鳴山不進亡歸山東與張汝楫聚

黨攻劫州縣殺掠

官吏山東大擾

發明

按劉氏書法曰兵起何盜也盜也曷為以兵起書金仇敵也然則曷為不書起兵眾詞也

與起義者微異矣夏人蒙古侵不書寇敵不書盜皆所以貶而外之之詞也綱目之旨綦嚴矣哉後書起兵亦倣此

壬申五年

金崇寧元年

春三月金赫舍哩呼沙呼有罪放歸田

里

呼沙呼欲移屯南口移文尚書省曰韃靼兵來必不能支一身不足惜三千兵為可憂十二關建春萬寧宮且不保金主惡其言下有司按問詔數其十五罪罷歸田里

蒙古克金宣德府

蒙古主旣克宣德遂攻德興府坎墉而登金人禦之
蒙古兵不利蒙古主第四子圖墨與齊奇駙馬復擁
酋先登而射之金兵引却蒙古遂盡拔
德興境內諸城堡而去金人復守之

夏五月安南王李龍翰死其壻陳日熒襲主國事

龍翰卒子吳昂嗣尋卒無子以女昭聖主國事其壻
陳日熒因襲取之李氏自公蘊八傳凡二百二十餘
年而
易姓

金河東陝西大饑

斗米錢數千
流莩滿野

發明胡氏曰凡外災告則書所謂灾者害及民物如水火兵戎饑饉旱乾之類是也是時女真中微四境洶洶生民塗炭河東陝西根本之地而乃斗米錢數千流莩滿野兼之兵戈四起魚肉羣黎金之業亦殆矣哉卽綱目之所書驗金國之得失則人心天命可以觀矣

金泰安劉二祖兵起掠淄沂州○秋七月雷雨太廟屋

壞

權直學士院真德秀上疏曰臣博觀經籍史傳所志自非甚無道之世未聞震霆之驚及於宗廟者魯之展氏人臣耳已卯之異春秋猶謹書之蓋震霆者上天至怒之威宗廟者國家至嚴之地以至怒之威而加諸至嚴之地其為可畏也明矣古先哲王遇非常之變異則必應之以非常之德政未嘗僅舉故事而

已今日避殿損膳之外咸無聞焉或者固已妄議陛下務為應天之文而不究其實矣臣願陛下內揆之一身外察諸庶政勉進君德毋以養養安逸為心博通下情深求致異召和之本庶幾善祥日應咎徵日消矣

發明

文十三經書世室屋壞君子譏其怠慢蓋太廟天子祖宗之廟也書太廟屋壞譏久不脩

也何以知其久乎自常時不雨則無壞道也雷雨於七月而先君之廟壞不恭甚矣凡此皆志寧宗怠慢不謹事宗廟以致室衰削之由垂戒切矣

廣義

德秀之疏可謂通天人之至言也寧宗得此而不知省其無敬天之實可知已書曰達於

上下敬哉有土寧宗何足以知此

癸酉六年

金至寧元年九月以後宣宗珣真祐元年

春正月宇文紹節卒○二

月樓鑰罷○故遼人耶律瑠格取金遼東州郡自立為

遼王

瑠格契丹人仕金為北邊千戶蒙古兵起金人疑遼遺民有他志瑠格不自安遁至龍安聚眾至十餘萬自為都元帥遣使附於蒙古金遣呼實率兵往攻瑠格大敗之遂自立為遼王改元元統盡有遼東州郡遂都咸平

發明

書故遼人予義也遼為金滅不共戴天苟能倡義復君之地者亦綱目之所予瑠格遼國

之冑既取故地自立為王少延遼國之祀豈不深可取哉故書予之綱目急於復讐之意切矣

夏四月以章良能參知政事。五月夏侵金保安慶陽。金主永濟復以赫舍哩呼沙呼為右副元帥。秋八月呼沙呼弑永濟而立昇王珣，自為太師尚書令都元帥封

澤王

金主復用呼沙呼使將兵屯燕城北圖克坦鎰諫不聽。呼沙呼與其黨完顏綽諾富察陸錦烏庫哩道剌等謀作亂。會金主以蒙古兵在居庸關而呼沙呼日務馳獵不恤軍事，遣使責之。使者至呼沙呼怒遂妄稱知大興府圖克坦南平反奉詔入討，分其軍為三。由章義門入，自將一軍由通玄門入，恐城中兵出拒先遣一騎馳抵東華門大呼曰：「難艱！」至北關已接戰矣。既又遣一騎往亦如之，使其黨圖克坦金壽召圖

克坦南平南平不知至廣陽門呼沙呼遇之於馬上
手刃殺之完顏石古乃聞亂召兵五百迎戰不勝皆
死之呼沙呼至東華門護衛實呼奇爾等納之呼沙
呼入宮盡以其黨易宿衛自稱監國都元帥居大興
府陳兵自衛召聲伎與親黨會飲明日以兵逼金主
出居衛邸遣武衛兵二百固守之呼沙呼欲除拜其
黨令黃門入宮收璽尚宮左夫人鄭氏掌寶璽拒之
曰璽天子所用呼沙呼人目取將何為黃門曰今天
時大變主上且不保况璽乎御侍當思自脫計鄭氏
厲聲罵曰若輩宮中近侍思遇尤隆君難不以死報
反為逆豎奪璽邪我死可必璽必不與遂瞑目不語
黃門乃還呼沙呼復遣人奪取宣命之寶除拜其黨
數十人丞相圖克坦鑑以陸馬傷足在告聞難作命
駕將入省或告之曰省府皆以軍士守不可入矣少
頃軍士索人於閭巷鑑乃還第呼沙呼欲僭位猶豫
不決以鑑人望乃詣訪之鑑從容謂曰翼王章宗之

兄顯宗長子衆望所屬元帥決策立之萬世之功也
呼沙呼默然乃遣宦者李思中弑金主於邸時完顏
綱將兵十萬行省事於緡山呼沙呼誘而殺之因盡
撤沿邊諸軍赴中都平州騎兵屯薊州以自重遣圖
克坦鑑迎昇王珣於彰德九月至燕卽位立其子守
忠為太子追廢永濟為東海郡侯後追復衛王諡曰
紹

發明

書復以赫舍哩呼沙呼為右副元帥貳過之
詞也春秋之法趙盾以不越境而書弑許世

子止以不嘗藥而書弑鄭歸生以憚老懼讒而書
弑楚公子比以不能效死不立而書弑齊陳乞以
廢長立幼而書弑呼沙呼身為元帥親行悖逆執
其主於宮使宦者李思中弑之謀立昇王尚復何
辭綱目凡專國之臣於其進爵則必以自為書之
况呼沙呼擁兵脅制弑君立幼天子在其掌握則

以自為太師尚書令都元帥封澤王書之夫豈過哉例以春秋誅心之法參諸綱目之所書而並信廣義永濟閭弱呼沙呼暴橫難乎免於其弑矣若然非蒙古能亡女直女直自亡之耳於蒙古乎何尤

冬十月蒙古大敗金將珠格高琪於懷來進圍燕高琪還殺呼沙呼金主以高琪為左副元帥

蒙古兵至懷來金元帥右監軍珠格高琪拒之敗績僵尸四十餘里蒙古乘勝至古北口金兵保居庸不能入蒙古主乃留克特卜齊等頓兵拒守而自以衆趨紫荆關敗金兵於五回嶺援涿易二州分命哲伯將兵反自南口攻居庸關破之出北口與克特卜齊軍合既而又選諸部精兵五千騎奇爾台哈台二將

圍守中都方蒙古兵至早河欲渡高橋呼沙呼病足乘車督戰蒙古兵大敗翌日再戰呼沙呼創甚不能出期高琪以紕軍五千拒之高琪失期不至呼沙呼欲斬之金主以其有功諭令免死呼沙呼乃益其兵令出戰戒之曰勝則贖罪不勝斬汝高琪出戰自夕至曉北風大作吹石揚沙不能舉目金兵大潰高琪自度必為呼沙呼所殺乃以紕軍入中都圍呼沙呼之第呼沙呼聞難作登後垣欲走衣絰墜而傷股軍士就斬之高琪取其首詣闕請罪金主赦之因詔暴呼沙呼之罪奪其官爵以高琪為左副元帥一行將士論功行賞

發明

殺者殺無罪也呼沙呼弑君之賊法所必討金不能殺而高琪殺之宜也何不書誅而書

殺原情也呼沙呼固為有罪然高琪之殺非誠於討賊者特因師敗懼誅殺之所以避己之罪耳故

書殺而不書誅不予其討有罪也金主不別可否
遂受元帥之職何其名器之倒施乎然則綱目上
書蒙古大敗珠格高琪而下書高琪還殺呼沙呼
則其義亦深切而著明矣豈以亂賊之故而遂廢
權衡之
公哉

廣義

呼沙呼暴橫而殺其主天假手於高琪
殺之嗚呼上天之降罰豈爽其報復哉

蒙古以史天倪為萬戶屯霸州

時蒙古穆呼哩統兵侵金所向殘破永清人史秉直
聚族謀曰方今國家喪亂吾家百口何以自保既而
知降者皆得免乃率里中數千人詣涿州軍門降穆
呼哩欲用秉直辭乃以其子天倪為萬戶領降人家
屬屯
霸州

十二月夏取金涇州。○蒙古分兵拔金河北河東諸州郡。

蒙古主留奇爾及哈台屯燕城北分降人楊伯遇劉林漢軍四十六都統并韃靼兵為三道命其子卓沁察罕台烏格台三人為右軍循太行而南破保州中山邢洛磁相衛輝懷孟諸郡徑抵黃河大掠平陽太原別將克特卜齊等遵海而東破灤薊大掠于遼西之地蒙古主自將與子圖壘由中道破雄漢清滄景獻河間濱棗濟南等郡引兵復自大口以逼中都時中原諸路之兵皆僉往山後防遏悉僉鄉民為兵上城守禦蒙古盡驅其家屬來攻父子兄弟往往遙呼相認由是人無固志故所至郡邑皆下凡破金九十餘郡兩河山東數千里人民殺戮幾盡金帛子女牛馬羊畜皆席卷而去屋廬焚燬城郭邱墟惟大名真

定青鄆邳海沃順通
州有兵堅守未能破

甲戌七年

金真祐二年

春正月章良能卒。三月召安丙同知

樞密院事未至改知潭州

丙使所愛吏安蕃何九齡合官軍夜襲秦州敗歸沔
州都統制王大才執九齡等七人斬之而訟丙於朝
故有潭州之命

金以其故主永濟之女歸蒙古夏四月及蒙古平

蒙古主還自山東屯燕城北諸將請乘勝破燕蒙古
主不從遣使諭金主曰汝山東河北郡縣悉為我有
汝所守惟燕耳天既弱汝我復迫汝於險天其謂
我何我今還軍汝不能犒師以弭我諸將之怒耶金

丞相高琪言於金主曰韃靼人馬疲病當決一戰完顏承暉曰不可我軍身在都城家屬各居諸路其心向背未可知戰敗必散苟勝亦思妻子而去社稷安危在此一舉莫如遣使議和待彼還軍更為之計金主然之遂遣承暉求和蒙古主欲得其公主金主乃以東海郡侯少女及金帛童男女各五百馬三千與之蒙古主引歸出居庸關取所虜山東兩河壯男女數十萬皆殺之金主以蒙古既和大赦其國內

廣義

分注云金遣承暉往求和且許以公主歸之金銀男女各五百嗚呼金索宋金銀未已尋

以之而許蒙古所謂黃雀利於螳螂而挾彈者已在其後矣天網之密良可畏夫然則書曰及者何以見金人之汲汲然也兩國強弱之勢判矣

金以布薩安貞為山東安撫使。金左丞相圖克坦鎰

卒

金主將遷都於汴鎡曰鑾輿一動北路皆不守矣今已講和聚兵積粟固守京師策之上也南京四面受兵遼東根本之地依山負海其險足恃備禦一面以爲後圖策之次也金主不從鎡尋卒鎡明敏方正學問該貫一時名士皆出其門

廣義

圖克坦鎡諫遷都策最爲有得金主不聽者是自促其亡也由乎蒙古哉

五月金主珣徙都汴扈衛紂軍叛降蒙古秋七月蒙古

復圍燕

金主以國蹙兵弱財用匱乏不能守中都乃議遷於汴諫者皆不納五月命平章政事都元帥完顏承暉

左丞穆延盡忠奉太子守忠留守中都遂與六宮啓行蒙古主聞之怒曰旣和而遷是有疑心而不釋憾特以解和為疑我之計耳復圖南侵金主至良鄉命護衛紇軍元給鎧馬悉復還官紇軍怨之遂作亂殺其主帥素溫推卓多必實呼勒扎拉爾三人為帥北還完顏承暉聞變以兵阻盧溝卓多擊敗之軍勢旣張遣使乞降於蒙古蒙古主遂遣明安援卓多合其兵圍燕京金主聞之遣人召太子應奉翰林文字完顏素蘭以為不可平章珠格高琪曰主上居此太子宜從且汝能保都城必完乎素蘭曰完固不敢必但太子在彼則聲勢俱重邊隘有守則都城無虞昔唐明皇幸蜀太子實在靈武蓋將以擊天下之心也不從竟召太子太子旣行中都益懼

發明 孟子曰遷國以國存者權也守正而效死者義也是時西北盡失所存者燕京乃金咽喉

之地必守而不可棄也況既與敵和復謀遷汴不惟人心不從抑且敵得藉口既而扈衛軍亂敵復圍燕自是燕京甫失敵長驅以至於汴矣然則金之遷國果何益哉苟信圖克坦鑑之言勿為忘動則國亦未至於遽亡也惜乎金主不足以語此耳吁

廣義

蒙古之於女直嘗欲得其瑕釁而指為興兵之端金之南遷適足以為蒙古之口實也且逆女未幾而敗盟蒙古肆侮於金也甚矣然則蒙古之必欲追取詎可以盟誓要乎

罷金歲幣

時金人屢遣使來督歲幣起居舍人真德秀上疏請絕之其畧曰女真以蒙古侵陵徒巢於汴此吾國之至憂也蓋蒙古之圖滅女真猶獵師之志在得鹿鹿之所走獵必從之既能越三關之阻以攻燕豈不能

欽定四庫全書

御批歷代通鑑輯覽
卷十八

絕黃河一帶之水以趨汴使蒙古遂能如劉聰石勒之據有中原則疆場相望便為鄰國固非我之利也或如耶律德光之不能即安中土則奸雄必將投隙而取之尤非我之福也今當乘敵之將亡亟圖自立之策不可幸敵之未亡姑為自安之計也夫用忠賢脩政事屈群策收衆心者自立之本訓兵戎擇將帥繕城池飭戍守者自立之具以忍恥和戎為福以息兵忘戰為常積安邊之金繒飾行人之玉帛女真尚存則用之女真強敵更生則施之強敵此苟安之計也陛下以自立為規模則國勢日張人心日奮雖強敵驟興不能為我患以苟安為志嚮則國勢日削人心日偷雖弱金僅存不能無外憂蓋安危存亡皆所自取若夫當事變方興之日而示人以可侮之形是堂上召兵戶內延敵也微臣區區竊所深慮反覆數千言帝納之遂罷金國歲幣

發明 自金人暴慢江左偷安稱叔姪增歲幣委為固然畧無可否則是辱祖宗而尊敵國賸百姓以益強鄰其敵愾之氣為之大屈矣茲因真德秀之言遂罷金之歲幣可謂能從善者耳宋人此舉差強人意故特表而出之

以鄭昭先簽書樞密院事○夏人請會師伐金不報

夏人以書來四川議夾攻金以恢復故疆時董居誼初入蜀不之報由是邊訊中絕

發明 書夏人請會師伐金予何義也書不報譏失策也宋金世讐理宜報伐幸而夏人請討三面合兵破之必矣柰何姑息之心久讐恥之念忘違而不報豈禮也哉安有堂堂天朝忘其至恨迨夫邊夷請討拂而不從者其無能為明矣是故予在夏人則罪在宋室矣

九月朔日食○蒙古將穆呼哩攻金遼西州郡下之

穆呼哩進兵攻金北京守將銀青帥衆二十萬禦於花道敗還嬰城自守其裨將完顏實呼高德玉等殺銀青推音達琿為帥穆呼哩命史天祥等趣兵進攻音達琿遂舉城降穆呼哩怒其降緩欲坑之蕭額森曰北京為遼西重鎮既降而坑之後豈有降者乎穆呼哩從之奏音達琿權北京留守以烏頁爾權兵馬帥府事以鎮之於是金順成懿通州相繼降於蒙古

冬十二月金遼州李全兵起

全遼州北海農家子銳頭獠目權譎善下人弓馬趨捷能運鐵鎗人號李鐵鎗開禧中戚拱嘗結之以復遼水金主遷汴賦歛益橫河北山東遺民保砦阻險群聚為盜寇掠州郡皆衣紅衲襖以相識時目為紅

襖賊全與仲兄福亦聚數千鈔掠山東劉慶福國安用鄭衍德田四於洋於潭等皆附之

金張鯨據錦州自稱臨海王附於蒙古

時興中府石天應亦降蒙古

乙亥八年金貞祐三年

春二月雷孝友罷○金布薩安貞擊楊

安兒安兒敗死三月安貞復破劉二祖斬之

布薩安貞至益都敗安兒於城東安兒奔登州刺史耿格納之安兒遂僭號置官屬改元天順衆數十萬安貞復與山東行省完顏霆經歷洪果將花帽軍討敗之殲其衆安兒乘舟入海欲走岨嶠山舟人曲成等擊之安兒墜水死無子其妹四娘子狡悍善騎射劉全收餘黨奉之稱曰姑姑衆尚萬餘掠食至磨騎

山李全以其衆附之楊氏因與私通遂以為夫安貞遣瓜爾佳錫爾格破劉二祖斬之餘黨推霍儀為帥彭義斌石珪夏全時青裴淵

葛平楊德廣王顯忠附焉

金主遣兵救燕與蒙古兵遇於霸州大潰夏五月中都留守右丞相完顏承暉自殺蒙古遂入燕

時金中都被圍既久完顏承暉以穆延盡忠久在軍旅悉以兵付之而自總持大綱又遣人以礮寫奏告急金主命左監軍永錫將中山真定軍左都監烏庫哩慶壽將大名軍萬八千西南路步騎萬一千河北軍一萬御史中丞李英運糧大名行省富珠哩調遣繼發以救中都英至大名得兵數萬馭衆素無紀律三月英被酒與蒙古兵遇於霸州北大敗盡失所運糧英死士卒殲焉慶壽永錫軍聞之皆潰歸自是中

都援絕內外不通承暉與盡忠會議期同死社稷盡忠不從承暉怒卽起還第然兵柄旣皆屬盡忠承暉無如之何乃辭家廟召左右司卽中趙思文謂之曰事勢至此惟有一死以報國家耳五月一日承暉作遺表付尚書省令史師安石書之皆論國家大計及平章政事高琪姦狀且謝不能終保都城之罪從容若平日盡出財物召家人隨年勞多寡分給之舉家號泣承暉神色泰然方與安石舉白引滿謂之曰承暉於五經皆經師授謹守而力行之不為虛文旣被酒取筆與安石訣最為創馮二字投筆曰遽爾謬誤得非神志亂邪謂安石曰子行矣安石出門聞哭聲復還問之則已仰藥死矣家人勿勿瘞庭中是日暮凡在都中妃嬪聞盡忠將南奔皆束裝至通玄門盡忠給之曰我當先出與諸妃啓途諸妃信之盡忠乃與愛妾及所親者先出城不復反顧蒙古兵遂入都中吏民死者甚衆宮室為亂兵所焚火月餘不滅時

蒙古主在桓州聞燕陷遣使勞明安等而輦其府庫之實北去於是金祖宗神御及諸妃嬪皆淪沒焉盡忠行至中山謂所親曰若與諸妃皆來我輩豈得至此安石奉承暉遺表至汴贈尚書令廣平郡王謚忠肅盡忠至汴金主釋不問仍以爲平章政事未幾以謀逆伏誅

發明

區區金事浸不可爲者中都圍久糧盡援絕正宜選將擇兵使之往救而乃以素無紀律之李英將之是弟子與尸而又不正也若曰金兵非有能潰之者金自潰之焉耳數萬之兵一時潰散金之不亡又可得乎承暉固守中都竭其智力爲穆延盡忠所制知事無成仰藥而死是亦明於君臣之大義者矣回視偷生迎降之徒豈不異哉故書自殺所以予其殺身成仁之義也臨難無苟免承暉無愧焉或以付託非人而罪承暉則誤矣

廣義完顏承暉之死可謂盡忠於金矣綱目不以死節予之而以自殺書者何蓋承暉死於蒙古未入燕之前而不死於蒙古入燕之後故也觀其書遂入燕其義見矣

秋七月以鄭昭先參知政事曾從龍簽書樞密院事○八月金命侯摯行尚書省事於河北○冬十月夏取金臨洮○蒙古攻金潼關不克遂自嵩山趨汴金人敗之乃還

蒙古主駐軍魚兒渚遣織格巴圖帥萬騎自西夏趨京兆以攻潼關不能下乃由嵩山小路趨汝州遇山礮輒以鐵鎗相鎖連接為橋以渡遂赴汴京金主急召花帽軍於山東蒙古兵至杏花營距汴京二十里

花帽軍擊敗之蒙古兵還至陝州適河水合遂渡而北金人專守關輔時蒙古兵所向皆下金主遣使求和蒙古主欲許之謂薩木哈曰譬如圍場中獐鹿吾已取之矣獨餘一兔盍遂舍之薩木哈恥於無功不從遣人謂金主曰若欲議和可去帝號稱曰當封汝為王議遂不成

十一月復遣使如金

賀正旦也刑部侍郎劉鑰等及太學諸生上章言其不可不報

發明

莊八年師及齊師圍郕君子以親仇讐為罪今寧宗與金主不與共戴天無時焉可通也

而遣使往賀正旦是忘親釋怨不義甚矣夫賀者親執玉帛往之彼國捧觴上壽屈膝於敵以為有人心者宜於此焉變矣故削其使名而特曰復遣以著其罪當時劉鑰諸臣非不諫諫而不聽寧宗

何其
愚哉

以真德秀為江東轉運副使

德秀朝辭奏五事一曰宗社之恥不可忘言國家之於金人蓋萬世必報之讐高宗孝宗值其方強不得已以太王自處而以勾踐望後人今天亡其國近在朝夕誠能以待敵之禮而遇天下之豪傑以遺金之費而厲天下之甲兵人心奮張士氣自倍何憚於金人而猶事之哉且重於絕彼者畏召怨而啓釁也然能不召怨於亡金而不能不啓釁於新敵權其利害孰重孰輕臣願陛下勉勾踐之良圖懲謝元之失策則王業興隆可冀矣二曰比鄰之道不可輕言蒙古及山東之盜苟得志而鄰於吾莫大之憂也願朝廷毋輕二敵日夜講其攻守之策以逆杜窺窬之心三曰幸安之謀不可恃言今之議者大抵以金之存亡

為我欣戚聞危蹙之報則冀其非實得安靜之耗則幸其必然是猶以朽壤為垣而望其能障盜賊也願陛下自強之志恢立武之經毋以敵存為喜敵亡為畏則大勢舉矣四曰導諛之言不可聽言今邊事方殷正君臣戒懼之日而薦紳大夫工為諛說或以五福足恃為言夫乾象告愆邇日尤甚其可恃識緯不經之說而忽昭昭之儆戒乎惟陛下鑒天人之相因察諛佞之有害益脩其本以格天休宗社之慶也五曰至公之論不可忽言公論國之元氣也元氣痞鬲不可以為人公論湮鬱不可以為國深未今日實公論屈伸之機朝廷之上若以言者為愛君為報國無猜忌之意而有聽用之誠則公論自此愈伸若以言者為沮事為微名無聽用之誠而有猜忌之意則公論自此復屈夫公論伸屈乃治亂存亡之所繇分故曰於篇終反復極言惟陛下亮且愚忠也

廣義

分注載德秀之論五事可謂老成謀國者矣於時寧宗遂當惕然於中昭示其書於中外

與群臣朝夕策勵君臣未睦思以睦之國用未足思以足之邊境未備思以備之士卒未訓思以訓之若之何而為君子必欲進之若之何而為小人必欲退之虛心以受直言勿拒諫也誠心以待臣下勿外貌也固我國本無先敵人俟敵有釁然後起而圖之可也昔者有論中國禦戎之策以為中國之處外敵如富人與貧人鄰宜待之以禮結之以恩高其墻垣威以刑法蓋待之以禮者使命往來嚴夫條約禮數以束之結之以恩者歲遺餘物以飽飫之高其墻垣則高城深池以堅吾之守備威以刑法則俟其有釁然後興師問罪斯言得之矣寧宗君目不此之慮而徒欲恢復正孔子所謂暴虎馮河者也君子奚取焉

十二月蒙古穆呼哩殺張鯨鯨弟致復據錦州自稱瀛

王

蒙古以張鯨總北京十提領兵從奪呼蘭薩里必南
征鯨懷反側穆呼哩覺之令蕭額森監其軍至平州
鯨稱疾逗遛不進額森執而殺之鯨弟致憤其兄被
害乃殺長史據錦州自稱瀛王改元興隆畧平灤瑞
利義懿廣寧等州下之穆呼哩帥先鋒蒙古布
哈權帥烏頁爾等軍討之州郡皆復降蒙古

丙子九年金貞祐四年春二月朔日食○東西兩川地大震

馬湖夷界山崩入
十里江水不通

發明事有未形而應先見者機有未發而兆先成者可見天道之與人心焉可誣也地乃陰質

而外患小人乃陰類東西兩川地為大震則強敵竊發之機萌矣不踰年而金人又至變不虛生信哉宋君目苟能明此益飭邊備思患預防則天道之警於我乎得焉惜其不能以自是懼迨夫金兵既臨倉卒遣備嗚呼亦晚矣綱目特書於冊以見天道人心有感必應常相符而不相遠者爾噫

夏四月遼王瑠格降蒙古

蒙古主以為元帥令居廣寧府

金以胥鼎為尚書左丞行省事於平陽

胥知平陽府聞蒙古兵渡潼關遣必喇阿魯岱圖克坦百家帥兵萬五千由便道濟河以趨關陝而自以精兵援汴京又遣布薩薩固珠帥兵會諸將以拒蒙古之自關而東者金主以其忠拜胥左丞遣還平陽

六月張致降金

金以致行北京
路元帥府事

秋七月金郝定稱帝於山東侯摯討殺之

時摯移行省於東平獲紅襖賊訊之知其渠帥郝定
借號署官改元已攻陷滕兗單諸州萊蕪新泰等卜
餘縣道路不通摯帥師
進擊執定送汴京誅之

冬十月蒙古克金潼關

蒙古兵次嵩汝間金御史臺言敵兵踰潼關峭汚深
入重地近抵西郊彼知京師屯宿重兵不復叩城索
戰但以遊騎遮絕道路而別兵攻擊州縣是亦困京
師之漸也若專以城守為事中都之危又將見於今

日况公私蓄積視中都百不及一此目等所以寒心也願陛下命陝西兵扼距潼關與伊爾必斯為犄角之勢選在京勇敢之將十數各付精兵隨宜伺察且戰且守復諭河北亦以此待之金主以奏付尚書省平章珠格高琪曰臺官素不習兵備禦方畧非所知也遂止高琪以蒙古兵日逼欲以重兵屯駐汴京以自固州郡殘破不復恤金主惑之國勢益衰

十一月蒙古穆呼哩圍錦州殺張致

穆呼哩以致兵精且依險為阻欲設奇取之乃遣烏頁爾等別攻溜石山堡且諭之曰汝等急攻溜石賊必遣兵往援我出其不意斷其歸路可一戰擒也又令蒙古布哈別屯永德縣西十里以伺之致聞溜石被圍果以兵救蒙古布哈遣騎扼其歸路且馳報穆呼哩夜半引軍疾馳比曙抵神水與致遇而蒙古布

哈兵亦會前後夾擊大破之致遂奔潰進圍錦州致
屢戰不利乃閉門拒守月餘其監軍高益縛致出降
穆呼哩
殺之

金胥鼎敗蒙古於平陽

鼎慮蒙古兵扼河乃檄絳解隰吉孟五州經畧司相
與會師為夾攻之勢及蒙古自三門折津北渡至平
陽鼎遣兵拒戰
蒙古兵敗乃去

金以苗道潤為中都經畧使

道潤貞祐初為河北義軍隊長以擊群盜有功屢遷
知中山府頃之復有是命道潤有勇畧敢戰鬪能得
衆心前後撫定五十餘城署保定
張柔為元帥右監軍行元帥府事

丁丑十年金興定元年

春正月金主珣謀伐夏不果

金主命選兵三萬五千圖門呼圖克們統之西征尚書左丞胥鼎馳奏以為非便畧曰北兵經過之後民食不給兵力未完若又出師非獨饋運為勞民將流亡愈至失所或宋人乘隙而動復何以制之此繫國家社稷大計方今事勢止當禦備南邊西征未可議也遂止尋進鼎平章政事封莘國公

地震○二月金尚書省請罷府州學生廩給金主不許

尚書省以軍儲不繼請罷州府學生廩給金主曰自古文武並用向在中都設學養士猶未嘗廢況今日乎其令仍舊給之

發明 觀金主於國家顛沛流離之際而能不忘養士之心亦可以知所本矣特書於冊蓋予之

也

三月金以武仙同知真定府事

金主徵山東兵接應苗道潤共復中都而石海方據真定叛慮為所梗乃集鈕祜祿貞郭文振威州刺史武仙所部精銳與東平為犄角之勢圖之武仙率兵斬石海及其黨二百餘人降葛仲趙林張立等軍盡獲海僭擬物故有是命

夏四月金人分道入寇詔京湖江淮四川制置使趙方李珣董居誼飭兵禦之

初金有王世安者獻取盱眙楚州之策金主以為淮南招撫使遂有南侵之謀珠格高琪復勸金主侵宋

以廣疆土金主始猶不然至是命烏庫哩慶壽完顏
薩布帥師南侵遂渡淮犯光州中渡鎮執榷場官盛
允升殺之慶壽分兵犯樊城圍棗陽光化軍別遣完
顏阿林入大散關以攻西和階成州朝廷聞之詔趙
方李珪董居誼俱便宜行事以禦之先是金右司諫
許古上疏請遣使與宋議和則蒙古聞之亦將歛跡
不宜用兵以益敵金主卽命古草議和牒文旣成示
參政高汝礪汝礪言有哀祈之意徒示微弱無足取
者議遂寢平章政事胥鼎亦切諫南侵有六不可高
琪不從金主以南北用兵西夏復擾財匱兵弱為憂
集百官議守禦之策高琪

心忌之有所言皆不用

發明

嗚呼金人自取滅亡之道矣是時北有蒙古
之侵西有夏人之擾惟東南粗安盜賊充斥

正宜保境自治尚恐弗支今信姦謀搆兵於宋則
是東南西北腹背受敵雖欲不亡其可得乎雖然

金與蒙古世為仇讐不能北向一決却乃稱兵犯順是豈剛則不吐柔則不茹之道哉故下書救棗陽金人敗走所以見中國非久屈者又以見仇敵非可結之以信也綱目可謂深切著明者矣

廣義

金主不虞蒙古之吞噬與夫宋讐之將復反惑於珠格高琪之言而欲南侵以自廣是猶

寒疾不汙之人而飯
乎林也嗚呼殆哉

金侯摯遣兵擊劉二祖餘黨執霍儀斬之其眾皆散

時濟南泰安滕兗等州賊並起摯遣完顏霆率兵討之霆自清河出徐州斬儀前後斬首千餘招降偽元帥石珪夏全餘眾皆潰

五月趙方遣統制扈再興鈐轄孟宗政等救棗陽金人

敗走

金人犯襄陽棗陽方語其子范葵曰朝廷和戰未定觀此益亂人意吾策決矣惟有提兵臨邊決戰以報國爾遂抗疏主戰因親往襄陽檄統制扈再興陳祥鈐轄孟宗政等禦之仍增戍光化信陽均州以應聲勢金人來自團山勢如風雨再興等分三陳設伏以待既至再興中出一陣復卻金人逐之宗政與祥合左右兩翼掩擊之金人三面受敵大敗血肉枕籍山谷間尋報棗陽圍急宗政午發峴首遲明抵棗陽馳突如神金人大駭宵遁方聞捷大喜以宗政權知棗陽軍未幾京湖將王辛劉世興亦敗金兵於光山隨州

六月詔伐金

詔畧曰仇讐肆彼憑陵天厭久矣鉅走不能擇音人競逐之若能立非常之勲則亦有不次之賞遂傳檄招諭中原官吏軍民從趙方之請也

發明 帝舜命禹征有苗其詞曰咨禹惟時有苗弗率汝徂征禹乃會羣后誓於師曰濟濟有衆咸聽朕命蠢茲有苗昏迷不恭侮慢自賢反道敗德君子在野小人在位民棄不保天降之咎肆予以爾衆士奉詞代罪爾尚一乃心力其克有勲江沱宴安今已四世惟事姑息不思復讐今而敵人侵擾又非有苗負固不服之比宋金世讐又非有苗自賢之比既已見犯理宜報伐特書詔伐金所以見天理之在人心有不可得而泯沒者所以示中國有復讐之義明人心有逆順之機而宋人此舉誠為義聲丕振矣故書以深予之

廣義

復讐之舉宋刻骨不銷者也而金軍方南侵則宋為有辭而直在宋矣此詔可謂適時而

與侂冑之詔不同也雖然宋於是時不能自固國本適足以為亡金之續耳可悲也哉

東川大水○太白經天○秋七月朔日食

發明

大水者陰逆所成太白者悖戾所結日食者陽道之虧是時金人入寇兵連禍結則其應

亦深切而著明矣凡綱目所書災異不言事應而事應具存未聞有其應而無其事者是以天道人心嘗相符而不相遠所以世之人主要當戒謹恐懼無時不然而流連荒亡之行勿使暫萌於胷中也奚可以為易而忽之哉

○李全率眾來歸詔李珣等節制京東忠義軍

時李全等出沒島嶼寶貨山積而不得食相率食人會鎮江武鋒卒沈鐸亡命山陽誘致米商獲利數十倍知楚州應純之償以玉貨北人至者輒舍之鐸因說純之以歸銅錢為名弛渡淮之禁由是來者莫可遏初楊安兒之未敗有意歸朝定遠民季先者大俠劉佑家廝養也嘗隨佑部網客山陽楊安兒見而悅之虞以運職安兒死先至山陽寅緣鐸得見純之道山東豪傑願歸正之意純之命先為機察諭意群豪以鐸為武鋒副將與高忠皎各集忠義民兵分二道伐金先遂以全五千人附忠皎忠皎與合兵攻海州糧援不繼退屯東海純之見北軍屢捷密聞於朝謂中原可復時頻歲小稔朝野無事丞相史彌遠鑒開禧之事不明招納密敕珏純之慰接之號忠義軍就聽節制給忠義糧於是東海馬良高林宋德珍等萬人輻輳漣水李全等生羨心焉

八月金以河南為中京。冬十二月李全及其兄福襲金青莒州取之。○蒙古以穆呼哩為太師經畧山南

蒙古主以穆呼哩有佐命功拜太師國王承制行事賜普券金印分鴻吉哩等十軍及蕃漢諸軍並隸麾下建行省於燕雲且謂之曰太行之北朕自經畧太行之南卿其勉之穆呼哩乃自中都南攻遂成及蠡州皆下之初蠡州拒守力屈乃降穆呼哩怒將屠其城時州人趙瑄從穆呼哩為署百戶泣曰母與兄在城中乞以一身贖一城之命哀懇切至穆呼哩義而許之遂東擊齊定臨淄登萊等州而去

蒙古圍夏興州夏主遵頊出奔西涼

發明

遵頊有民人焉有社稷焉蒙古內侵不能死守委而出奔不亦弱乎李氏之國從此衰微

而不振矣直書
出奔深罪之也

戊寅十一年

金興定二年

春正月以李全為京東路總管○二

月金人圍棗陽孟宗政擊敗之

宗政權棗陽初賊事一愛僕犯新令立斬之軍民股栗於是築隄積水脩治城堞簡閱軍士至是完顏薩布擁步騎圍城宗政與扈再興合兵角敵歷三月大小七十餘戰宗政身先士卒金人戰輒敗忿甚周城開濠控兵列濠外飛鋒鎬以絢鈴自警鈴響則犬吠宗政厚募壯士乘間突擊金人不能支盛兵薄城宗政隨方力拒隨州守許國援師至白水鼓聲相聞宗政率諸將出戰金人奔潰

金人焚大散關入早郊堡三月利州統制王逸將兵復

之進攻秦州至赤谷而潰

金完顏阿林入早郊王師死者五萬人逾月王逸帥官軍及忠義人十萬復之追斬金統軍完顏贊進攻秦州至赤谷口汧州都統劉昌祖命退師且放散忠義人軍遂大潰

夏四月金人陷西和成階州及河池興元都統吳政敗之乃去

金兵合長安鳳翔之衆復攻早郊遂趨西和州劉昌祖焚城遁還時西和守臣楊克家成州守臣羅仲甲階州守臣侯願以昌祖遁皆棄城走金兵遂入諸州前後獲糧九萬斛錢數千萬軍實不可勝計復犯大散關守將王立亦遁又犯黃牛堡吳政拒却之政至大散關執立斬之以拘事聞政進三官昌祖奪官竄

韶州克家等
並竄遠州

發明甚矣宋之武功若是乎其不競也觀敵騎長驅入蜀如焚大散關入早郊堡陷西和階成及河池守將聞風而靡棄城逃奔而罔敢與之拒者獨王逸將兵復之吳政將兵敗之而中國之氣庶幾少伸賴有此耳嗚呼以久安之宋不能敵殘敵之金以殘敵之金反能敵久安之宋何耶蓋金以積威之勢故雖敗亡而其氣猶存宋以委靡之習故雖全盛而其風尚在是以立國者貴乎自強也故併及之

五月金中都經略副使賈瑀殺苗道潤道潤將張柔討之至紫荆關遇蒙古與戰被執遂降蒙古

道潤素與瑀有隙一日從數騎出瑀伏甲射之道潤顛於道左從者駭散有何伯祥者獨下馬掖道潤道潤憊絕不能乘馬瑀伏發箭突伯祥奮鎗大呼殺數人賊乃遁去伯祥取道潤所佩金虎符以出令疾足聞道以聞道潤之衆無所依卻將靖安民代領之賈瑀不自安遣使告張柔曰吾得降道潤者以君不助兵故也柔怒叱使者曰瑀殺吾所事吾食瑀肉且未足快意反以此言相戲邪遂檄召道潤部曲告以復讐之意衆皆羅拜推柔為長柔方會兵趨中山而蒙古兵出自紫荆關柔遇之遂戰於狼牙嶺柔馬跌為右強之柔叱曰彼帥我亦帥也大丈夫死即死終不偷生為他人屈明安壯而釋之其潰卒稍稍來集明安空柔為變質其二親於燕京柔歎曰吾受國原恩不意猖獗至此顧忠孝不兩立姑為二親屈遂降蒙古以柔為河北都元帥

發明

賈瑀積憤而殺道潤張柔伐之可謂能倡義者故以討予之然其降蒙古之事則不能無

憾焉蓋柔戰敗被執奮志不降後因質其二親由是降之亦不得已耳漢遼西太守趙苞鮮卑刼質苞母苞不顧進戰母乃遇害苞遂嘔血而死程子論曰以君城降賊而求生其母固不可矣然亦當求所以生母之方奈何不顧而遽戰乎必不得已身往降之可也徐庶於此蓋得之矣尹氏發明曰苞急於王事遂至不能全其母故雖嘔血而死綱目亦畧而不書所以權輕重而示訓也據趙張之事考程尹之說則是張柔之降為親所屈又非趙苞不顧之比然綱目亦畧而不書其故則其輕重之權衡亦畧可見矣抑又論之趙苞忠於王事不能全母程子何以議其非然則有父子而後有君臣其輕重為可見禮曰父母在不許友以死則其輕重為可知故程子曰以君城降賊固不可必不

得已身往降之夫如是則得以兩全而無害云爾程子之言豈欺我哉

廣義宋之所處即徐庶之事也其賢於王陵遠矣厥後終臣於蒙古而反為鄉道以減金則其

害於義也
可勝言哉

金石州人國安用來降詔以安用同知孟州事。秋八月

蒙古穆呼哩復攻取金河東諸州郡金元帥烏庫哩

德升等死之

穆呼哩圓太原環之數匝金元帥烏庫哩德升力拒之城西北隅壞德升聯車塞之三却三登矢石如雨

守陴者不能立城破德升至府署謂其姑及妻曰吾守此數年不幸力窮乃自縊而死行省參政李華守

欽定四庫全書

御批續資治通鑑綱目

卷十八

平陽兵少援絕城陷或謂草宜上馬哭圍出革數曰吾不能保此何面目見天子汝輩可去矣遂自殺節

度使完顏恩徹亨守汾州元帥右監軍納哈塔布拉圖守潞州城破皆力戰而死

發明烏庫哩德升等不過斃之武臣尚能為君守地竭力禦之迨夫事不可支或自縊而死

或自殺而死或力戰而死無一偷生而縛乞降者由其明於順逆之道故耳噫以一勇之夫皆能為

君死義況中國士大夫背國事讐烏可以人名哉故綱目亦以全節予之所以為人臣事君不忠之

勸垂訓之義
益深切矣

冬十二月金主珣遣使來求和不納遂使其太子守緒

會兵入寇

金主欲乘勝來議和以開封府治中呂子羽為詳問使至淮中流不納迺去由是和好遂絕金主以布薩輔太子守緒南侵

發明晉顯元和八年春趙遣使來脩好詔焚其幣君子予之蓋宋氏立國江左奄奄畧無振起

之氣獨至女真遣使來求和不納是舉差強人意大書揭之蓋幸之也

廣義鳴呼昔也宋之衰也求成于金而金不許今也金之衰也求成於宋而宋亦不許焉報復

之勢其有窮乎曰然則何為而可曰自治而已人不求成於我我不求成於人國之富庶則脩文德

以守之耳周之成康漢之文景其庶幾焉

已十二年金興定三年春正月金人復寇西和成鳳州入黃

欽定四庫全書

御批續資治通鑑綱目

卷十八

牛倭吳政拒戰死之

政既死金人乘勝攻武休關都統李貴迺還權興元府事趙希堯棄城走金人遂入興元府沔州都統張

威使石宣邀擊之於大安軍大破之殲其精兵三千人俘其將巴圖魯安金人乃遁去

發明鳴呼宋之守將不過徒擁虛名一聞敵至莫不望風逃奔惟恐或後獨吳政以忠政自守

前既大敗金人此復力拒金人勢不能支卒死於難其正大之氣屹然如山不可撼矣若政之忘身

殉國者幾何人哉故綱目特書死之所以予其全義也垂訓之意切矣

金人復大舉圍棗陽趙方使知隨州許國等率師攻唐

鄧以救之

金額爾克圍棗陽塹其外繞以土城方計其空巢穴而來若擣其虛則棗陽之圍自解乃命國及扈再興引兵三萬餘分二道出攻唐鄧二州又命其子范監軍葵為後殿

發明凡書救者未有不善之也是時金兵猖獗大舉圍城棗陽之危奚啻焚溺趙方部分諸將率兵救之然何以不直赴棗陽而乃攻唐鄧耶此吳子救蔡之義春秋所以為善救也故書予之

以曾從龍同知樞密院事任希夷簽書院事

希夷嘗從朱熹學篤信力行為禮部尚書以朱熹張拭呂祖謙皆已賜諡而周惇頤程顥程頤張載四人為百代絕學之倡尚未贈諡乃上言乞定議賜諡朝廷從之

金人入洋州竄董居誼於永州以聶子述為四川制置

欽定四庫全書

御批續資治通鑑綱目

卷十八

使

守臣蔡晉卿遣兵拒之不克洋州遂陷金人焚其城而去居誼自利州遁還詔竄之

夏人請會師伐金詔許之○三月以鄭昭先知樞密院

事曾從龍參知政事○金人寇淮西知楚州賈涉使李

全救却之詔加全廣州觀察使

金人圍安豐軍及滁濠光州江淮制置使李珣命池州都統制武師道忠義軍都統制陳孝忠救之皆不克進金人遂分兵自光州犯黃州之麻城自濠州犯和州之石埭自盱眙犯滁州之全椒來安及揚州之天長真州之六合淮南流民渡江避亂諸城悉閉金遊騎數百至采石楊林渡建康大震時涉以淮東提

刑知楚州節制京東忠義慮忠義人兵為金所用乃遣陳孝忠向滁州石埭夏全時青向濠州季先葛平揚德廣趙滁濠李全李福要其歸路季全進至渦口與金左都監赫舍哩約赫德駙馬阿哈連戰於化湖破殺金將數人得其金牌金人乃解諸州之圍而去金追擊之復敗之於曹家莊而還金人自是不敢窺淮東初涉募能殺金太子者賞節度使殺親王者賞承宣使殺駙馬者賞觀察使全因致所得金牌於涉云殺駙馬阿哈所獲者涉請於朝乞如約受賞遂授全廣州觀察使而阿哈實不死也

發明宋之名器至是益濫矣李全雖有拒却金人察之使殊不知實為全之所欺也蓋全本降賊初非心乎宋者幸而累勝不過優之以金帛而未可加之以官爵小人之心得志浸驕迨至他日之亂豈不實基於此乎由辨之不早也故綱目揭而備

欽定四庫全書

御批續資治通鑑綱目

卷十八

書於冊其謹微之意深矣

興元卒張福等作亂夏四月陷利州聶子述走保劔門

福掠閬果

興元軍士張福莫簡作亂以紅巾為號入利州聶子述退保劔門撤醴泉觀使安丙子知果州癸仲兼節制軍馬任討賊之事癸仲召沔州都統制張威等帥兵來會福等殺總領財賦楊九鼎遂掠閬果州

曾從龍罷○復以安丙為四川宣撫使

張福等作亂四川大震張方魏了翁移書宰執謂安丙不起則賊未即平蜀未可定雖賊亦曰須安相公作宣撫使事乃定耳李壁李塽亦以國事勉丙乃至果州會詔丙為宣撫知興元府利州路安撫使民

安 心始

發明

復以者悔過之詞也是時張福作亂攻陷城邑其勢危矣董居誼之為制使而乃棄城逃

歸鼎子述之為制使而亦走保劔門其無謀可知安丙素得蜀心廢置既久茲因張方等之薦復為宣撫則人心從此而安盜賊從此而息矣可見衆小人收之為不足一君子安之為有餘是以為國者當得人才以輔治之也故下書討張福誅之乃所以著其功耳若丙可謂不辱君命而能行已志者焉特書於冊蓋予之也

金築汴京裏城

初珠格高琪請脩南京裏城金主曰此役一興民滋病矣城雖完固能獨安乎高琪固請築之既而金主

慮擾於民募人能致甓五十萬者遷一官百萬升一
等於是平陽判官完顏阿拉左廂譏察霍定和發蔡
京故居得二百萬有奇准格還賞金主一日問曰人
言此役恐不能就高琪曰苟防城有法正使兵來臣
等愈得効力金主曰與其臨城曷若不令至此為善
高琪無以對及城成高琪受金賜之賞建碑書功於
會朝門

發明
鑿斯池築斯城與民守之效死勿去此固國
君守社稷之正義然必有其說焉與其敵來
而守之曷若未至而拒之金主惑高琪之邪策築
汴京之裏城不過用民力於無用之地耳地雖利
而人不和孰為我守哉由是以守汴為得計而以
防敵為非謀河北河東置之度外汴京亦從而困
疲矣據事直書不
再貶而其義自見

廣義

珠格高琪不務內治之脩決意遷都南京其為計左矣既遷矣未聞其施一善政出一良

策今又增築裏城所以為禦敵之計可謂左中之左者也嗚呼秦皇長城豈不固耶適足以為災漢之資耳賈誼所謂秦之亡者仁義不施而攻守之異也然則恃險固不可與修德比亦其勢則然耳觀者勿以辭害義可也

蒙古張柔侵金獲賈瑀殺之金武仙與戰於蒲城敗績河北郡縣多降蒙古

蒙古使柔帥兵南下遂克雄易保安諸州柔必欲誅賈瑀而瑀據孔山臺柔攻之不下臺無井泉汲山下柔先斷其汲道瑀窮乃降柔縛瑀剖心以祭苗道潤遂引兵次於蒲城武仙會鎮定深冀兵數萬攻之柔

全軍適出帳下才數百人柔命老弱婦女乘城自率壯士突出仙兵後毀其攻具從數騎策馬杖槊大呼入圍仙衆皆披靡復使綠山多張旗幟聲言救至曳柴揚塵鼓譟以進仙兵大潰柔追擊之尸陳數十里柔乘勝攻完州下之於是祁陽曲陽等帥皆降於柔柔遂圍中山府仙遣其將葛鐵鎗與柔戰於新樂飛矢中柔頰落其二齒柔拔矢以戰葛鐵鎗大敗死者數千人仙復遣劉成攻柔柔又敗之遂南掠金鼓城深澤寧晉諸縣由是深冀以北鎮定以東三十餘城望風降附柔之威名震於河朔

發明

殺者殺無罪也張柔此舉不為非義然何以不書誅而書殺原情定罪也賈瑀雖有擅殺

苗道潤之罪然亦為金之臣子張柔既已降敵則於金君目之義乖雖有殺瑀報道潤之心亦不過以賊攻賊固不足取矣然前史皆以誅賈瑀為文而分注亦然足未得去取之公也綱目正色書之

曰殺所以罪柔之失節不以討賊之義予之也然後權衡正而逆順明諸家之說不攻自破矣夫豈以作史常法而視之哉

廣義

張柔金之元帥也其為苗道潤報仇是矣當其降於蒙古非其本心也為二親屈也其既

降矣則當以計出二親而歸於金可也烏可反攻金之城而畧金之地哉故綱目書蒙古張柔者罪其反金也前書討賈孺而此不書討而書殺者柔既反金而不予其討賊也後欲叛逆者盍亦知所戒矣

六月安丙討張福誅之

福衆薄遂寧權府事程遇孫棄城走福入遂寧焚其城遂入普州守臣張已之棄城走福屯於普州之茗

山安丙自果州如遂寧下令諸軍合圍絕其樵汲之路以困之張威兵至福窮青降威執之以獻於丙丙命繫其黨王才以祭揚九鼎而誅福旣而張威捕莫簡及賊衆一千三百餘人誅之紅巾賊悉平丙班師

還治於

利州

孟宗政扈再興合擊金人於棗陽大敗之追至鄧州而

還

金元帥額爾克擁步騎傳城宗政囊擁盛沙以覆樓棚列甕豬水以隄火募砲手擊之一砲輒殺數人金人選精騎二千號弩手擁雲梯天橋先登又募鑿銀鑛石工晝夜埴城運茆葦直抵圍樓下欲焚樓宗政先燬樓掘深坑防地道期戰棚防城損穿窬才透卽施毒煙烈火鼓鞀以薰之金人窒以濕氈折路以剗

土城額樓陷宗政撤樓益新架火山以絕其路列勇士以長鎗勁弩備其衝距樓陷所數丈築偃月城翼傳正城金人摘疆兵披厚鎧軫衫鐵面而前又濕氈濡革蒙火山擁雲梯徑抵西北圍樓登城城中軍以長戈舂其喉殺之敢勇軍自下夾擊金兵墜死燎焰金人連不得志會扈再興許國兩道並進掠唐鄧境焚其城柵糧儲金頓兵棗陽城下八十餘日趙方知其氣已竭乃召國再興還併東師隸於再興尅其合戰再興敗金人於漢河又敗之城南宗政自城中出擊内外合勢士氣大振賈勇入金營自補至三更殺其衆三萬金人潰額爾克單騎遁獲其資糧器甲不可勝計迫金人至馬磴寨焚其城入鄧州而還金人自是不敢窺襄漢棗陽中原遺民來歸以萬數宗政發廩贍之給田砌屋與居籍其勇壯號忠順軍俾出境外金人呼為孟爺爺

發明

金人之圍棗陽至是已踰半載緣其城邑絕

往來之使禁樵採之途其危甚矣內而孟宗

政竭力捍禦外而扈再興合兵赴援此其所以大

獲全勝也二將之功為如何哉惜其不能併力恢

復至鄧遽還為可憾耳此綱

目既予其功又譏其餒也

廣義

岳武穆嘗云師以曲直為老壯以逆順為強

弱蓋金人無故南侵則曲逆在金故其師必

老且弱此金之所以屢敗也宋以金之南侵而興

師以伐之則直順在宋故其師必壯且強此宋之

所以屢勝也兵誌曰同力

度德同德度義此之謂歟

秋七月李全復齊州○九月以賈涉主管淮東制置司

節制京東河北軍馬

初山東來歸者日衆而石珪以計殺沈鐸於漣水應
純之亦罷去權楚州梁丙無以贍之季先乞預借兩
月糧然後帥所部五千并馬良等萬人往密州就食
丙不許先請速遣李全代領其衆丙亦不從而以石
珪權軍務珪乃奪運糧之舟渡淮大掠至楚州南渡
門焚燬幾盡丙遣人諭之不止知盱眙軍賈涉上書
言忠義之人源源而來不立定額自為一軍處之北
岸則安能以有限之財應無窮之需饑則噬人飽則
用命其勢然也朝廷命涉節制忠義人兵涉受命卽
遣傅翼諭石珪揚德廣等以逆順禍福珪等乃謝罪
涉慮其人衆思亂因滁濠之役分石珪陳孝忠夏全
為兩屯李全為五砦又用陝西義勇法涅其手合諸
軍汰者三萬有奇涅者不滿六萬人正軍尚屯七萬
使主勝客朝廷歲省費什三四至是分江淮為三司
乃命涉
管淮東

蒙古恃穆津伐西域諸國。○金張林以山東諸郡附李
全來歸詔以林為京東安撫使

初蒙古克益都不守而去益都府卒張林與其黨復
立府歸金以功為治中兇險不逞知府田琢在山東
徵求過當甚失衆心林率其黨逐之琢戰敗乃還汴
林遂據益都山東諸郡皆附之林欲歸附以自固而
未決會李全自齊州還揣知林意乃薄兵青州城下
遣人陳說國家威德勸林早附林恐全誘已猶豫未
納全挺身入城惟數人從林乃開門納之相見甚驩
謂得所托置酒結為兄弟全既得林要領附表奉青
莒密登萊濰淄濱隸寧海濟南十二郡版籍來歸表
辭有云舉七十城之全齊歸三百年之舊主詔授林
武翼大夫京東安撫使兼京東總管

冬十二月趙方使扈再興許國孟宗政帥師分道伐金

方以金人屢敗必將同時並攻當先發以制之乃遣再興等帥師六萬分三道而進戒之曰毋深入毋攻城第潰其保甲燬其城砦空其貲糧而已

發明

宋氏南渡奄踰四世國步多艱未遑遠畧今女真構兵安忍塗炭生民方且移戈南向志

吞江表宋能不畏其強思所以自立朝議稍稍振起至是趙方帥師分道伐金雖未能一舉盪定然亦足覘其意伺之所在矣揭而書之所以尊中國存正統示人以克復之意其垂訓也大矣

廣義

趙方戒諸將之辭可謂得其機而握其要者歟

李全襲泗州不克而還

時大雨雪淮水合全請於賈涉曰每恨泗州阻水今如平地全請取東西城自效涉許之全以長鎗三千人從夜半渡淮潛伺泗之東城將踏濠水傳城下掩金人不備俄城上荻炬數百齊舉遥謂全曰賊李三汝欲偷城耶天黑故以火燭之全知有備乃引兵還

金右丞相珠格高琪有罪伏誅

高琪自執政專固權寵擅作威福與平章政事高汝礪相倡和高琪主機務汝礪掌利權附己者用不附者斥凡言事忤意及負才力或與己諍頑者對金主陽稱其才使幹當於河北陰置之死地又以己為相不得兼樞密元帥以攬兵柄乃與汝礪力勸金主南侵置河北於意外凡精兵皆集河南苟且歲月不肯輒出一卒以應方面之急至是使奴薩布殺其妻因歸罪於薩布而殺之以滅口事覺金主久知其姦遂

下高琪於獄殺之初金主將遷汴欲置紇軍於平州
高琪難之及發中都金主戒搏多厚撫紇軍搏多輒
殺數人且勸金主取其元給器用故有卓多之難而
中都亡金主嘗嘆曰壞天下者高琪搏多二人也
廣義高琪之罪路人所知也綱目書曰金右丞相
珠格高琪有罪伏誅者以見金主於國步艱
難之秋尤能
奉行天討也

蒙古攻高麗降之

蒙古兵襲叛人於契丹經高麗之境高麗人洪大宣
降且為鄉導共攻其國國王暉降自是交通使命往
來不絕也

庚辰
十三年
金興定四年

春正月扈再興許國攻唐鄧州皆不

克而還

發明

恢復與兼并異兼并謂之貪兵恢復謂之義兵宋失中原子孫有能恢復之計者皆當予

之故前書李全襲泗州不克而還此書扈再興許國攻唐鄧州不克而還皆無貶詞一以存中國之體二以伸義士之氣三以示不忘讐恥之心其與春秋書乾時之戰雖敗亦榮者同意固非予其窮兵黷武也君子詳觀綱目所書之旨思過半矣其與晉書褚裒帥師伐趙不克而還同義

○孟宗政敗金人於湖陽○三月金胥鼎致仕○夏四月蒙古陷孟州○金封經畧使王福等九人為郡公分河北山東地以隸之

初太原為蒙古所有河北州縣不能自立金主詔百
官議所以為長久計翰林承旨圖克坦高等十六人
謂制兵有三曰戰和守今欲戰則兵力不足欲和則
彼不肯唯有守耳河朔州郡既殘毀不可一槩守之
宜取願就遷徙者屯於河南陝西不願者許自推其
長保聚險阻宣徽使伊喇光祖等謂當募土人威望
服衆者假以方面重權能復一道卽授以本道總管
能捍州郡卽授以長佐必能各保一方宰臣欲置公
府金主意未決中丞完顏伯嘉曰宋人以虛名戮李
全遂有山東苟能統衆守土雖三公何惜金主曰他
日事定公府無乃多乎伯嘉曰若事定以三公就節
鎮何不可金主從之乃封滄州經畧使王福為滄海
公以清觀滄州鹽山無棣樂陵東光寧津吳橋將陵
阜城脩縣隸之河間招撫使伊喇重嘉弩為河間公
以獻彝安深州河間肅寧安平武強饒陽六家莊郎
山寨隸之真定經畧使武仙為恒山公以真定府沃

冀威鎮寧平定州抱犢寨樂城南宮縣隸之中都東
路經畧使張甫為高陽公以雄霸冀州高陽信安文
安大成保定靜海寶坻武清安次縣隸之中都西路
經畧使靖安民為易水公以涿易安肅深州君氏川
季鹿三保河北江礮山寨青白口朝天寨水谷懽谷
東安寨隸之遼州刺史行元帥府事郭文振為晉陽
公河北東路皆隸之平陽招撫使胡天作為平陽公
以平陽晉安府隰吉州隸之昭義節度使完顏伯開
為上黨公以澤潞沁州隸之山東安撫副使燕寧為
東莒公以益都府路皆隸之九公皆兼宣撫使總帥
本路兵馬署置官吏徵斂賦稅賞罰號令得以便宜
行之除已畫定所管州縣外如能收復鄰近州縣者
亦聽管屬同時九府
財富兵強唯武仙耳

廣義

金主此舉最為有識不
猶愈於蒙古之所取邪

六月賈涉誘殺漣水忠義軍副都統季先其下推石珪為帥以拒涉

季全自化湖陂之捷有輕諸將心以季先威望出已上陰結賈涉所任吏莫凱使諧先欲反涉信之乃以計命先赴樞密院議事於道殺之而遣統制陳選總先衆於漣水先部曲裴淵宗德珍孫武正王義深張山張友六人拒選不納而潛迎石珪於盱眙奉為統帥珪道楚城涉不之覺遂入漣水選還涉恥之謀分珪軍為六請於朝出修武京東路鈐轄印誥各六授淵等以分統先衆淵等陽從命而實不奉涉教令涉恐甚詔以珪為漣水忠義軍統轄

發明

季先初無過惡特因季全忌而諧之故誘而殺之不得為天討也故書誘殺而不去其官

既而季先之衆違涉教令而推石珪為帥以拒之然則激變之禍涉實尸之故直書以著其罪

廣義

李全狼子野心豈可以人理待之邪彼其化湖陂之捷有輕諸將心賈涉被其詐而以觀

察使授之則既愚於前矣今又信其讒而殺季先果何義哉夫事苟出於非義則於人情為不順宜乎其下之拒命也烏有為國大臣而誘人以殺之耶書曰誘者譏涉也

秋七月金使人如蒙古求和

金使烏庫哩仲端如蒙古求和
呼蒙古主為兄蒙古主不允

八月金嚴實據青崖峒以魏博等郡來歸李全遂會張林襲東平敗績乃還

當時金之兵力固衰以敵方張之元則不足以敵垂敵之來則有餘兵法有云知彼知己宋人何其昏憤也先是遼困于金宋乘其釁已為遼所敗前車既覆而不悔亦深可憫哉

金長清縣令嚴實為主將所疑挈家壁於青崖峒依益都張林以避之會趙拱以朝命諭京東過青崖實因求內附拱奉實款至楚州賈涉以聞實亦分兵四出所至州縣皆下於是太行之東皆授實節制實乃舉魏博恩德懷衛開相等郡來歸涉因再遣拱往諭配以兵二千李全亦請往涉不能止乃帥楚州及盱眙忠義萬人以行拱說全曰將軍提兵渡河不用而歸非示武也今乘勝取東平可乎全乃合張林軍得數萬襲東平之城南金行省蒙古綱帥師固守全與林夾汝水而砮詰旦金監軍王庭玉以騎兵三百奄至全欣然上馬帥帳前所有騎赴之殺數人奪其馬逐北抵山谷遇金龍虎上將軍鄂博台盛兵以出旁有繡旗女將持槍突圍全幾不免會諸將赴救援全以出乃退保長清精銳喪失大半全恐所携鎮江軍五百人懷憤乃使拱先將之以歸而自以餘衆道滄州假鹽利慰贍之尋還楚州

發明

金之臣來歸何以不書叛宋正陵遲幸其來也雖金臣有向義之心而宋不當納叛起釁

故其書法如此見宋之不能知彼知已矣

廣義

李全輕挑非干城器也彼嚴實以魏博等郡來歸自歸耳奚可輕舉妄動而遂襲東平哉

其能脫虎吻者倖焉

張林攻金滄州王福以城降○太子詢卒

謚曰

景獻

安丙遣兵會夏人伐金

丙遣夏人書定議同舉約以夏兵野戰我師攻城遂命利州統制王仕信帥師赴熙秦鞏鳳翔委丁燦節

制且傳檄招諭陝西五路官吏軍民

發明 安丙遣兵伐金初非君命不亦專乎綱目書之何以畧無貶詞是時宋遣江表中原淪於敵國在朝諸人宴安自肆曾不以讐敵為念獨丙志在恢復能以伐金取蜀為已任是以前書丙討張福誅之下書會夏人伐金是皆示其予之之意也明乎此則知為呂者當以狗國為心為國者當以紹復為念而好攻戰務邀攻者與此異矣

復海州以徐晞稷知州事○夏取金會州金遣使如夏議和○金恒山公武仙以真定降蒙古穆呼哩以史天倪權知河北西路兵馬事仙副之

穆呼哩至滿城使蒙古布哈將輕騎三千出倒馬關
適武仙遣葛鐵鎗攻臺州蒙古布哈與之遇葛鐵鎗
戰敗仙遂舉城降史天倪說穆呼哩曰金中原已粗
定而大兵所過猶縱鈔掠非王者弔民伐罪之意且
王為天下除暴豈可效他軍所為乎穆呼哩
善之卽下令禁剽掠遣所俘老幼軍中肅然

廣義

大抵人心天理其機甚微而其應則甚速失
此則亡得此則興其興其亡捷於影響惟視

天理所在何如耳嗚呼蒙古始事而
有可觀如此雖欲不元其可得乎

九月夏人圍金鞏州官軍會之不克而還

夏遣其樞密使寧子寧率衆二十萬圍鞏州且來趣
兵王仕信帥師發宕昌四川宣撫司統制質俊李實
帥師發下城安丙命諸將分道進兵沔州都統張威
出天水利州都統程信出長道興元都統陳立出大

散關統制田胃出子午谷金州都統陳昱出上津威
下令所部諸將毋得擅進兵於是諸將遲疑不進質
俊等克來遠鎮敗金人於定遠城王任信克鹽川鎮
程信引兵會夏人於鞏州攻城不克遂趨秦州夏人
自定遠砦退師信復邀夏人共攻秦州不從遂自伏
羌城引兵還諸將皆罷兵信以宣撫司命斬仕信於
西和州
罷威官

發明

其曰官軍賤金人也曰不克而還識不果也
既與夏人合兵伐金便當進行毋致疑貳而

張威小人方且下令毋得擅進為言人心得無解
體乎故書不克而還所以明其自止也豈不深可
惜哉

蒙古遣使如金

蒙古主遣達呼報金謂烏庫哩仲端曰向欲汝主授我河朔地彼此罷兵汝主不從今念汝遠來河朔既為我有關西數城未下者則割付我令汝主為河南王勿復違也

冬十月金以時青為濟州宣撫使封滕陽公

青與叔父全俱為紅襖賊及楊安兒劉二祖敗青承赦降隸軍中為濟州義軍萬戶後附李全來歸處之龜山有衆數萬至是金元帥赫舍哩約赫德遣人招之青以書乞假邳州以屯老幼當襲取盱眙盡定淮南以贖罪金主乃封青為滕陽公本處兵馬總領元帥兼宣撫使而未授以邳

廣義

公爵人臣之極者也金於時青既知為賊又公其爵則其國政之缺失蓋可見矣不亡何

待書曰爵罔及惡德
金人曷足以知之

十一月蒙古穆呼哩入濟南嚴實復以魏博等郡降蒙古

穆呼哩既戢士卒州郡悅附遂以輕騎入濟南嚴實挈所部三府六州戶三十萬詣軍門降穆呼哩承制拜實行尚書省事實將李信乘實出殺其家屬來降實攻信殺之復取青崖峒

金人襲蒙古穆呼哩於濟南大敗穆呼哩進圍東平

時金兵二十萬屯黃陵岡遣步卒二萬襲穆呼哩於濟南穆呼哩迎戰敗之遂薄黃陵岡金兵陣河南岸穆呼哩令騎下馬短兵接金兵大敗溺死者衆穆呼哩遂進陷楚邱由單州趨東平圍之

蒙古耶律楚材進庚午元歷

楚材都木達王托雲八世孫金尚書右丞履之子貞祐三年為中都行省員外郎中都陷遂降於蒙古蒙古主嘗訪遼宗室召楚材謂之曰遼金世讐吾為汝報之矣楚材對曰臣祖父以來嘗北面事之既為臣子豈敢復懷二心讐君父邪蒙古主重其言命處左右備訪問楚材通術數之學尤邃於太玄時從征西域以金大明歷不應製庚午元歷上之蒙古主每征伐必令楚材預卜吉凶亦自灼羊脾以符之然後行廣義楚材八世祖遼之宗室也後人不能復讐而降金豈直二其心哉忘君父之大讐者也其既降於金矣則楚材乃金之臣也又不忠於金而降於蒙古則是自祖及孫舉懷二心而忘君以事讐者也何無愧心慚德而以懷二心之說告蒙古哉譬猶女之失身者雖其色越南威技成天巧不足貴也易曰見金夫不有躬無攸利其楚材之謂乎

十二月石珪叛降蒙古賈涉命李全併將其軍

石珪以入漣水非賈涉本意心懷不安而李全復請討珪於涉涉遂以全所統衆列於楚州之南渡門而移淮陰戰艦於淮岸以示珪有備因命一將招珪軍來者增錢糧不至者罷支給衆心遂散珪伎窮乃殺裴淵而挾孫武正宋德珍降於蒙古穆呼哩以珪為元帥理旣去漣水之衆未有所屬李全求併將之涉不能卻遂以付之

發明 前書推石珪為帥則珪猶為宋之臣子故不絕之也今而降敵直書曰叛者所以著其背主降敵正其不赦之罪也石珪中國之將今以私憤之故遂懷異圖則其罪可勝誅乎卽綱目所書觀之可見誅亂臣討逆賊而為扶天理之至公也嗚呼微矣

時青自金來附以為京東鈐轄。蒙古穆呼哩以嚴實權山東西路行省事。

金兵固守東平不下。穆呼哩謂嚴實曰：東平糧盡必棄城去。若然，汝即入城安輯之，勿若郡縣以敗事也。乃留蘇嚕克圖以蒙古兵屯守之，以實權行省。謂干戶薩里台曰：東平破，可命嚴實石珪分城內南北以守之。遂北還。

金易水公靖安民為其下所殺。

安民出兵至礮山，取擔車寨。會蒙古兵圍安民所居山寨，守寨者以安民妻子及老弱出降。安民軍中聞之，駭亂，眾議欲降以保妻子。安民不從，遂遇害。

辛巳十四年

金興定五年

春正月時青入泗州西城二月金人

來救青敗乃還。金會兵於蔡州入寇三月陷黃蘄州引還扈再興李全追擊敗之

初金人寇蘄知州李誠之百計禦之會黃州失守金人併兵攻蘄城始陷誠之并其妻子官屬皆死之金兵退再興邀擊於天長敗之及渡淮北去全又大敗之

發明 自金再寇遽陷蘄黃知州李誠之闔門死節句微再興李全之追敗則中國辱矣故特書

以著其功

金東莒公燕寧與蒙古戰敗死。夏五月朔日食。蒙

古取金東平使嚴實石珪守之金以蒙古綱行省於邳州王庭玉行元帥府於黃陵岡

東平被圍久糧道復絕行省蒙古綱監軍王庭玉不能守率衆南趨邳州蒙古蘇魯克圖邀擊斬首七千級嚴實遂入城建行省於府第薩里台以穆呼哩命中分其城以嚴實撫安東平以北恩博等州石珪移州治曹

書法為將得人敵人皆其役也穆呼哩雖古良將不是過焉

六月立沂王嗣子貴和為皇子更名竑

帝以國本未立命選太祖十世孫年十五歲以上者教育宮中如高宗擇普安王故事於是立貴和為皇

子以貴誠為秉義郎貴誠初名與莒燕懿王德昭之後希璠之子也母全氏家於紹興山陰縣初慶元人余天錫為史彌遠府童子師性謹厚彌遠器重之彌遠在相位久以帝未有儲嗣而沂靖惠王近屬亦未有後欲借沂王置後為名陰擇宗室中可立者以備皇子之選會天錫告還鄉秋試彌遠密語之曰今沂王無後宗子賢厚者幸具以來天錫渡浙舟抵越西門會天大雨過全保長家避雨保長知其為丞相客具雞黍甚肅須臾有二子侍立天錫異而問之保長曰此吾外孫趙與莒與莒也日者嘗言二兒後當極貴天錫因憶彌遠言及還臨安以告之彌送命召二子來保長大喜嚮田治衣冠集姻黨送之且說其遇及見彌遠善相大奇之恐事洩不便遽使復歸保長大慙逾年彌遠忽謂天錫曰二子可復來乎天錫召之保長辭謝不遣彌遠乃使天錫密諭保長曰二子長者最貴宜還撫於其父家遂載至臨安及貴和立

為皇子乃補與莒秉義
郎賜名貴誠年十七矣

發明貴和乃太祖十世之孫德昭之後帝以國本未立特命選之此天下之至公也直書皇子定名分也名分定之於此然後史彌遠不可挾私以廢之矣此綱目予子之法所以防其僭竊之階人心天命於斯可見君子之為世慮豈不至深切哉此綱目謹於微之意也

秋八月任希夷罷以宣繪同知樞密院事俞應符簽書院事。京湖制置大使趙方卒

方病革曰未死一日當立一日紀綱及卒人皆思之方少從張拭學初知青陽縣告其守史彌遠曰催科不擾是催科中撫字刑罰無差是刑罰中教化人以為名言方守襄漢十年以戰為守合官民兵為一體

通制總司為一家許國之忠應變之畧隱然有樽俎折衝之風故金人擾邊淮蜀大困而京西一境獨全能用名人如陳睭游九功輩皆援為大吏扈再興孟宗政皆自土豪推誠擢任致其死力卒為名將故能藩屏一方使朝廷無北顧之憂

發明趙方忠藎自守堅如鐵石守邊十年以身殉國抗疏主戰務雪仇耻此皆實德之可稱者觀其未死一日當立一日紀綱之言苟非心乎宗室者安能言之若是乎此固宋仁義之將而非他將之可及也卒而具官豈過予之哉

九月立宗室貴誠為沂王後

貴誠疑重寡言潔脩好學每朝參待漏他人或笑語貴誠獨儼然出入殿庭矩度有常見者歛容彌遠益

異之至是立為

沂靖惠王後

廣義

昔詩人詠周王嗣續綿長有曰瓜瓞綿綿蓋謂瓜之生也至於近根莖者反小及其蔓延

於後則漸大焉今也宋之太祖德澤入人之深不幸而有太宗為之弟其一念之不仁天已鑒於冥冥之中而不善其報矣今使沂王絕嗣德昭有後巍然於閭閻之間而重器漸有所托太祖血食漸有可親者豈非上天默祐太祖及人之德也哉書曰作善降之百祥作不善降之百殃其宋之太祖謂歟太宗之

冬十月夏人復乞會師伐金○蒙古穆呼哩侵夏夏人以兵附之遂取金葭州及綏德州十一月圍延安府

穆呼哩由東勝州涉河引兵而西夏主聞之遣塔爾海監府等宴穆呼哩於河南且遣塔海甘布將兵五萬屬馬十月穆呼哩引兵東行入葭州金將王公佐遁穆呼哩以石天應推行臺守葭而自將兵攻綏德破馬克戎兩寨夏遣瑪爾布往會之瑪爾布問穆呼哩相見之儀穆呼哩曰汝主見我主卽其禮也瑪爾布曰未受命不敢卽拜因引衆去至是穆呼哩攻延安瑪爾布始贄馬而拜金帥哈達與納哈塔邁珠禦之哈達以兵三萬陳於城東蒙古將蒙古布哈先以騎士三千趨之約半夜伏發穆呼哩乃命軍士銜枚潛進伏於城東兩谷間明日蒙古布哈望見金兵佯棄旗鼓走金兵追之穆呼哩出伏乘其後鼓聲震天金兵大亂穆呼哩追殺七千餘人哈達走入延安城堅壁不出穆呼哩以城池堅深猝不可拔乃留軍圍之而自將兵南攻廊坊等州

四川宣撫使安丙卒詔以崔與之為四川制置使盡護

蜀軍

丙在四川以及為守成功甚著朝廷賴之及卒詔與之盡護四蜀之師與之開誠布公拊循將士人人悅服軍政復立

張林叛降蒙古穆呼哩以林行山東東路都元帥李福自膠西逃歸

李全既併將漣水忠義益驕悍輕朝廷及遊金山作佛事以薦國殤知鎮江府喬行簡方舟逆全大合樂以享之全歸語其徒曰江南佳麗無比須與若等一到始造舩艘舟謀爭舟楫之利焉膠西當登寧海之

衡百貨輻輳全使其兄福守之為窟宅計時互市始通北人尤重南貨價增十倍全誘商人至山陽以舟浮其貨而中分之自淮轉海達於膠西福又具車輦之而稅其半乃聽往諸郡貿易車夫皆督辦於張林林不能堪林財計仰六鹽場福恃弟有恩於林欲分其半林許福恣取鹽而不分場福怒曰若背恩邪待與都統提兵取君頭耳林懼其黨李馬兒說林歸蒙古林遂以京東諸郡請降於蒙古穆呼哩以林行山東東路益都滄景濱棗等州都元帥府事福狼狽走還楚州林猶遺賈涉書言非已叛實由李福也

發明

張林自金來歸此背主降人已屬叛臣今無故而復降蒙古則又背宋而去觀小人之進

退失據何其反覆之若是乎故直書叛以著其不赦之罪蓋林之叛皆李福兄弟相激而成今張林作亂不能捕獲奉頭鼠竄忠安在耶逃者匹夫之事以將帥之尊下效匹夫之行書逃歸不明深貶

之也福等既激林反又從而逃之又豈事君之道也哉噫此綱目之所以為綱目而非君子莫能脩之者矣

廣義 自古爭利之臣鮮有不敗其國事者賈涉得無罪乎

十二月鄭昭先罷○閏月遣使如蒙古

通好也蒙古尋遣使來報

壬午十五年 金元光元年

春正月朔受恭膺天命寶於大慶殿

大赦

初鎮江都統翟朝宗得璽於金師獻於朝既而趙拱又得玉印文與璽同而加大朝廷喜受之行慶賀禮

大赦賈涉遺書彌遠謂天意隱而難知人事切而易見當思今日人事尚未有可答天意彌遠不憚

發明

書曰無教逸欲有邦兢兢業業一日二日萬幾無曠庶官天工人其代之言天子當以勤

儉率諸侯不可以逸欲導之也今寧宗以得一璽一印而受賀大赦不亦愧乎時天下瓜分土宇龜析惟宋立國江左少延中國之正統值斯之際明賞罰聚人才儲揆擢飭邊備尚恐弗及而乃區區得一璽印御殿受賀肆赦天下而行此驕奢之事耶噫彌遠專國阿順苟容當時諸臣罔敢可否惟賈涉遺書之詞深切時政彌遠不聽詎不惜哉直書於冊不再貶而其義自見

二月李全復泗州○金人復入寇夏五月淮兵襲敗之

金主以朝廷絕歲幣國用以困乃命元帥左監軍額圖克行元帥事節制三路軍馬同簽書樞密院事時

全副之由賴壽進渡淮敗官軍於高塘市攻固始縣破廬州將焦思忠兵旣而獲生口言全之姪青受宋詔與全兵相拒全匿其事五月額爾克引還距淮二十里諸軍將渡全矯稱密詔諸軍且留收淮南麥遂下令人獲三石以給軍衆惑之留三日額爾克謂曰今淮水淺狹可以遠濟若值暴漲宋乘其後將不得完歸矣全力拒之是夕大雨明日淮水暴漲乃為橋渡軍官軍襲之全兵大敗橋壞全以輕舟先濟士卒皆覆沒全之兵財由是大竭金主詔數全罪而誅之

進封子竑為濟國公以貴誠為邵州防禦使

竑好鼓琴史彌遠買美人善鼓琴者納諸竑而厚撫其家使矚竑動息美人知書慧黠竑嬖之時楊皇后專國政彌遠用事久宰執侍從臺諫藩閫皆所引薦莫敢誰何權勢熏灼竑心不能平嘗書楊后及彌遠

之事於几上曰彌遠當決配八千里又嘗指宮壁與
地圖瓊厓曰吾他日得志置史彌遠於此又嘗呼彌
遠為新恩以他日非新州則恩州也彌遠聞之大懼
思以處竑而竑不知真德秀時兼宮教諫竑曰皇太
子若能孝於慈母而敬大臣則天命歸之矣否則深
可慮也竑不聽一日彌遠為其父浩飯僧淨慈寺與
國子學錄鄭清之登慧日閣屏人語曰皇子不堪負
荷聞後沂邸者甚賢今欲擇講官君其善訓導之事
成彌遠之坐卽君坐也然言出於彌遠之口入於君
之耳若一語泄吾與君皆族矣清之曰不敢乃以清
之兼魏惠憲王府學教授清之日教貴誠為文又購
高宗御書俾習焉清之謁彌遠卽示以貴誠詩文翰
墨譽之不容口彌遠嘗問清之曰吾聞皇姪之賢已
熟大要竟如何清之曰其人之賢更僕不能數然一
言以斷之曰不几彌遠領之再三策立之意益堅乃
日媒孽竑之失言於帝覬帝廢竑立貴誠而帝不悟

其意

知濟南府种贇討張林林敗走李全入青州據之

發明

奉詞伐罪曰討張林叛降蒙古人神共慣然朝廷無討伐之師遠近無倡義之將則亂臣

賊子終無所懲乎种贇仗義興師奉詞伐罪則斯舉誠為義戰矣故書討以予之李全不能合兵討賊而乃乘間據城其罪滋甚蓋入者逆而不順之詞據者得非其有之謂曰入曰據深貶之也綱目是非之權衡此類是矣

○六月愈應符卒○秋七月金平陽公胡天作降蒙古

時穆呼哩狗青
龍堡天作遂降

八月長星見西方

蒙古耶律楚材謂其
主曰女真將易主矣

發明

歷觀自春秋以至綱目二千餘年以來其所
書災異未有無其應者可見天道之與人心

不可忽也當嘉定壬子之歲而長星見於西方是
時江表粗安敵勢甫息而長星之出不亦誣乎蓋
明年而金主卒再踰年而帝崩史彌遠行廢立之
事此非世之大變耶故謹而志之可見天變之來
有徐有速但有徐速之不同未有有其變而無其
應者在乎人君脩為何如耳苟以天變為玩而忽
之則日積月累奚有不喪
邦者哉噫其垂訓也切矣

九月大名忠義彭義斌復京東州縣嚴實將晁海以青

崖峒降○以宣繪參知政事程卓同知樞密院事薛極
簽書院事○冬十月蒙古穆呼哩取金河中以石天應
權河東關陝行臺

穆呼哩所過州縣皆下時金於牛心寨僑治吉州事
穆呼哩自隰州攻之知州楊貞令妻孥先陞崖已從
之皆死穆呼哩入寨留兵守之且使蒙古布哈引遊
騎出秦隴以為聲援及視山川夷險而自將兵下孟
州晉陽霍邑等寨召石天應謂之曰河中為河東要
郡擇守非君不可乃以天應權行臺平陽太原吉陽
等帥並受節制穆呼哩遂趨長安使元哈
納台布哈屯守之遣昂吉將兵斷潼關

金王庭玉取曹州殺蒙古石珪○十一月蒙古穆呼哩

取金同州節度使完顏額爾布克死之

發明

死節必書嘉全義也蓋死節人臣之當然何以書勸善也能知綱目所書之意然後可與

論褒善貶惡之權衡矣

○十二月以李全為保寧節度使京東河北鎮撫副使

初全有戰功史彌遠欲加全官賈涉止之及加節鉞涉嘆曰朝廷但知官爵可以得其心寧知驕則將至於不可勸邪

蒙古特穆津屠默呼城滅回回國大掠痕都斯坦國而

還

先是蒙古主遣子卓沁察罕台烏格台圖墨分攻鄂托羅爾玉龍哈實等城而自將攻都哩木及巴喇勒台城克之遂圍塔爾哈寨拔之進薄回回國其王委國而去逃匿海嶼不旬日庾死蒙古主遂次痕都斯坦國鐵門關侍衛見一獸鹿形馬尾綠色而獨角能為人言謂之曰汝君宜早回蒙古主怪之以問耶律楚材對曰此獸名角端解四夷語是惡殺之象今大軍征西已四年蓋上天惡殺遣之告陛下願承天心宥此數國人命實無疆之福蒙古遂大掠痕都斯坦而還

發明

君子所最謹者仁暴之辨若夫曰戎曰狄曰赤狄曰狄之類春秋初未嘗罪之也蒙古特

穆津前已書稱帝矣然於其國則止書蒙古於其名則止書特穆津至其卒也書姓書名書死純以暴戾罪之此綱目之所以為綱目非君子莫能脩之蓋入者逆而不順之詞屠者殘暴不仁之詞滅

者已甚之詞掠者惡之之詞此皆所以貶而罪之
學者能深究其書法之旨始可與言綱目矣下書
穆呼哩死於解州其義做此

廣義

分注載角端之獸考之經典質之子史雖無
其實然則楚材以是而諫蒙古者亦可謂因

事納
忠也

癸未

十六年

金元光二年

春正月金元帥都監侯小叔取河中

殺蒙古石天應

穆呼哩攻鳳翔府晝夜苦戰四十餘日不下將由河
中北還金元帥右都監侯小叔襲河中破之殺石天
應焚浮橋而退穆呼哩以天應子烏格代領其衆初
金主命元帥都監阿魯岱守河中阿魯岱恒怯不能

軍竭民膏血為浚築之計及絳州破阿魯岱益懼馳奏河中孤城不可守有旨親視果不可守則棄之無至資敵阿魯岱遂棄河中燒民居官舍一二日而盡尋有言河中重鎮國家基本所在設為敵人所據則大河之險我不得專恃矣金主命有司復脩葺之終不能成故隨守隨陷

發明 河中金之故地侯小叔得之何不書復蓋金之先世藉憑陵之威據中國之地故雖已失而用兵力以復之特書曰取不予其復故地也此綱目維持正統之深意而非常史之可比矣

三月蒙古穆呼哩死於解州

穆呼哩自河中帥師還至解州聞喜縣疾篤謂弟岱遜曰我為國家助成大業干戈垂四十年無復遺恨所恨者汴京未下耳汝等勉之言乞而卒年五十四穆呼哩雄勇善謀與博爾濟博勒呼齊拉袞俱以忠

勇事其主號都爾本庫魯克猶華言四傑也蒙古主軍嘗失利會天大雪失牙帳所在卧草澤中穆呼哩與博爾濟張氈蔽之自暮達曉竟不移足博爾濟從征伐立功甚多極見親遇位終右萬戶博勒呼身更百戰竟死於陳位終第一千戶齊拉袞功業與三人者等四人之子孫皆領宿衛號四集賽出官則為輔相馬

夏五月蒙古初置達魯噶齊監治郡縣

蒙古主避暑於八魯灣川分兵攻諸部落之近者悉下之至昆布寨與諸將會以西域漸定置達魯噶齊於各城監治之達魯噶齊猶華言掌印官也

六月程卓卒○淮東制置使賈涉卒

涉以李全驕暴難制力求還朝在道卒初涉欲制忠義兵乃以翟朝宗統鎮江副司八千人屯楚州城中又分帳前忠義萬人命趙邦永高友統五千屯城西王暉於潭統五千屯淮陰李全輕鎮江兵而忌帳前忠義乃數稱高友等勇遇出軍必請以自隨涉不許全每宴麾下併召涉帳前將校於是帳前亦願隸全然未能合也及涉卒卹壽邁攝帥事全請曰忠義烏合尺籍鹵莽莫若別置新籍一納諸朝一申制閫一留全所庶功過有攷請給無弊壽邁從之全乃合帳前忠義與已軍盡籍之而併統其軍壽邁不悟

秋八月金將納哈塔陸格殺蒙古綱謀以邳州來附金人殺之

蒙古綱御下嚴邳州從宜經畧使納哈塔陸格謀殺之據州反與蒙古將李二措致書海州言欲來附李

全麾下周岳得之以報全全喜遣王喜兒以兵二千應接而已繼之二措納喜兒而囚之全欲攻邳四面阻水二措積勁弩備之全不得進合兵索戰而敗欲還楚州會濱隸有亂乃引兵趨青州金行院總帥約赫德討殺陸格復其城

發明

陸格殺主帥背本國乃金之亂賊也亂臣賊子人人得而誅之分注尚以討殺為文綱目

變文書殺若無罪焉者何耶蒙古綱殘暴御下是以致陸格激變叛而降宋故書曰殺見罪在蒙古綱也綱目罪坐主將之意其嚴如此

九月朔日食○冬十二月以許國為淮東制置使

初淮西都統許國奉祠家居欲傾賈涉而代之數言李全必反涉卒會召國入對國疏全姦謀益深反狀

已著非有豪傑不能消弭蓋自衛也遂易國文階為
淮東安撫制置使兼知楚州命下聞者驚愕淮東參
幕徐晞稷雅意開闢及聞國用
乃注釋國疏以寄全全不樂

金主珣卒子守緒立

金主疾革時已暮夜近臣皆出惟前朝資明夫人鄭
氏以年老侍側金主知其可托謂之曰速召太子主
後事言絕而殂夫人秘之是夕后妃問安寢閣麗貴
妃陰狡機慧常以其子英王守純年長不得立懷怨
鄭氏恐其為變卽給之曰上方更衣后妃可少休他
室伺其入遽鎗之急召大臣傳遺詔立皇太子守緒
始啓戶出后妃發喪太子方入宮英王已先至太子
知之分遣樞密院官及東宮親衛軍官伊喇布哈集
軍三萬餘於東華門街部署既定命護衛
四人監守純於近侍局乃卽位於樞前

蒙古攻夏夏主遵頊傳國於其子德旺

遵頊自號上皇德旺改元乾定
未幾遵頊卒德旺號之曰神定

蒙古蘇布特擊欽察滅之

大掠西番
邊部而還

發明

蒙古崛起沙漠憑陵海外恃其兵威以滅鄰
國是乃天之所興莫能與之抗禦者也然勞
師襲遠黷武窮兵君子譏焉凡
書滅者不再貶而其失自見

甲申十七年

金哀宗守緒
正大元年

春三月召崔與之為禮部尚書

以鄭損為四川制置使與之辭不拜

與之治蜀將士輯睦府藏充實至是以疾歸廣州蜀人肖其像祠焉

金使人來請和

金主遣尚書令史李唐英至滁州通好旣而復遣樞密判官伊喇布哈率兵至光州榜諭軍民更不南侵

秋閏八月帝崩史彌遠矯詔立沂王子貴誠更名昀尊

皇后為皇太后同聽政封皇子竑為濟王出居湖州

八月丙戌帝不豫史彌遠遣鄭清之往沂王府告貴誠以將立之意貴誠默不應清之曰丞相以清之從游久故使布腹心今不答一語則清之將何以答丞相貴誠始拱手徐言曰紹興老母在清之以告彌遠益相與嘆其不凡壬辰帝疾篤彌遠稱詔以貴誠為皇子改賜名昀授武泰軍節度使封成國公閏月丁

西帝崩彌遠遣皇后兄子谷石以廢立事白后后不
可曰皇子竑先帝所立豈敢擅變谷等一夜七往返
后終不許谷等乃拜泣曰內外軍民皆已歸心苟不
立之禍變必生則楊氏無類矣后默然良久曰其
人安在彌遠卽於禁中遣快行宣昀令之曰今所宣
是沂靖惠王府皇子非萬歲巷皇子苟誤則汝皆處
斬皇子竑時聞帝崩跣足以需宣召久而不至乃屬
目墻壁間見快行過其府而不入疑焉已而擁一人
徑過天牕不知為誰甚惑之昀入宮見后后拊其背
曰汝今為吾子矣彌遠引昀至樞前舉哀畢然後召
竑竑聞命卽赴至則每過宮門禁衛拒其從者彌遠
亦引竑至樞前舉哀畢引出帳殿帥夏震守之遂召
百官立班聽遺制則引竑至舊班竑愕然曰今日之
事我豈當仍在此班震紿之曰未宣制前當在此宣
制後乃卽位竑以為然已而遙見殿上燭影中有人
在御座則昀已卽位矣宣制畢閣門宣贊呼百官拜

賀竑不肯拜震梓其首下拜遂稱遺詔以竑為開府儀同三司封濟陽郡王判寧國府尊揚皇后曰皇太后垂簾同聽政詔遵孝宗故事宮中自服三年喪尋進封竑為濟王出居湖州史臣曰寧宗恭儉守文初年以舊學輔導之功召用宿儒引拔善類其政可觀中更韓侂冑內蓄群姦指正為偽外挑強鄰流毒淮甸函首求成國體虧矣及史彌遠擅權幸帝耄荒竊弄威福至於皇儲國統亦得乘機伺間遂其廢立之私他可知也

發明

矯詔何罪無君也易曰天尊地卑乾坤定矣司馬溫公曰禮莫大於分分莫大於名自古

姦臣賊子其發也有端其積也有漸而其成也植根固而流波漫矣上自共驩下暨斯高其禍敗同一轍也竑雖皆彌遠所選然自十四年書立竑為皇子十五年進封竑為濟國公則名分定之於

前久矣既而因聞流言彌遠憂懼而廢立之意益固特因寧宗未崩姑且隱忍寧宗已崩厥志斯遂彌遠何人而行廢立之事乎故書立沂王子貴誠書封皇子竑為濟王所以正名定分以明其當立不當立之義也綱目原於人心而定罪君子順於天理而用刑豈以彌遠闕白太后而乃未減其罪哉前史止書立沂王子貴誠封竑為濟王而彌遠之惡得以少掩此君子所以懼而綱目所由作也今而正色書之畧不少恕而必歸獄於彌遠然後人心正而名分明亂臣賊子始無所逃於天地之間焉

廢義

抑觀彌遠陰擇宗室中可立者之時卽有希冀權寵之心況得副意之賢其志固矣然竑

又以輕佻促之豈非益堅彌遠廢立之志邪雖然此亦上天陰祐理宗否則將以賢理宗者而賢竑

矣彌遠何能為故曰其子之賢
不肖皆天也豈人力之所能哉

九月詔傳伯成為顯謨閣學士楊簡為寶謨閣學士辭
不至

史彌遠欲收衆望勸帝褒表老儒遂詔傳伯
成楊簡及柴中行俱奉朝請伯成簡辭不至

以真德秀直學士院魏了翁為起居郎

初以德秀及禮部侍郎程秘吏部侍郎朱著並兼侍
讀工部侍郎葛洪起居郎喬行簡宗正少卿陳貴誼
軍器監王暨並兼侍講尋又以德秀直學士院召魏
了翁為起居郎德秀之為起居舍人兼宮講也言事
不避權貴且惓惓於復讐知史彌遠欲以爵祿縻天
下士慨然謂劉燾曰吾徒須急引去使廟堂知世有

不肯為從官者遂力請外至是自知潭州召還入對
勸帝容受直言召用賢臣固結人心為本帝開納之
了翁當開禧初以武學博士召試學士院對策諫開
選事御史徐相劾了翁狂妄了翁亦以親老出知嘉
定府尋築室白鶴山下以所聞於輔廣李燾者開門
授徒士爭負笈從之由是蜀人盡知義理之學及為
潼川轉運判官上疏乞與周敦頤張載程
顥程頤錫爵定諡示學者趨向朝廷從之

廣義

抑考德秀嘗為宮教以諫皇子竑曰皇子若能考於慈母以敬大臣則天命歸之否則深

可慮也竑不聽德秀因力請外而去嗚呼何其先
見之明若是耶至理宗卽位之初為侍讀為直學
士院為煥章閣待制任職不辭可謂能擇君者矣
易蠱之上九不事王侯高尚其志蹇之六二王臣
蹇蹇匪躬之故觀其去濟王也合乎蠱之上九就
理宗也合乎蹇之六二一去一就惟其時而已非

西山其孰

能之哉

追封希璪為榮王以其子與芮襲封奉祀

帝追封所生父希璪為榮王生母金氏為國夫人而以弟與芮嗣之

冬十月夏及金平

夏人與金通好不交兵者八十年至貞祐初以小故生釁構難十年一勝一負遂至精銳俱盡兩國皆弊至是夏遣其吏部尚書李仲諤脩好於金稱弟而不臣各用本國年號金遣禮部尚書奧敦良弼報之

十一月以葛洪同簽書樞密院事

御批續資治通鑑綱目卷十八